

四庫全書

子部

欽定四庫全書

圖書編卷一百二十四

明 章潢 撰

工曹總叙

禹作司空平水土見諸書乃召司空俾立室家見諸詩周禮冬官亡漢時補以考工記此後世工曹所由設然平水土立室家工之意可見矣夫冬官之職既不可考亦豈待考工記補之而後為冬官之全乎大

宰事典以富邦國以任百官以生萬民小宰事職以  
富邦國以養萬民以生萬物則事官之意在周禮可  
覩也周官亦曰司空掌邦土居四民時地利則司空  
之意在周官可推也況冬之為言終也萬物成終畢  
歸其根亶空土而已命之曰司空豈無意義而云然  
哉惟藏而固之富而生之此所以為冬之象也任其  
官而職司其藏斯無負于冬官司空之名也漢唐以  
來民曹左民起部工部設官分職名各不同其掌百

工之事則一而已矣我朝工部之設即周冬官大小司空以營繕虞衡都水營田分司其職掌固有在焉然孔子九經來百工財用足周禮周官富邦國養萬民生萬物時地利視今之工曹同乎異乎建國分野工匪細務况浚兩河之漕渠固九邊之城堡通東南之水利開西北之營屯禁四方居室器用毋作淫巧踰制傷財而敗俗今日足國富民宜莫切於此者若夫悅以使民民忘其勞龍見戒事火見畢工在論語


使民以時盡之矣噫司空執度度地居民無曠土無  
游民食節事時民咸安其居樂事勸工尊君親上然  
後興學想王制非無稽之言也會而通之考工記曾  
足以補之哉

# 天象司空圖

壁

土公

土司空




離宮



土公吏

危蓋屋

室十月而農工已畢  
此星昏而正中故主  
營建宮室詩云定之  
方中作于楚宮是矣  
離宮天子之別館也  
百工之事惟土木為  
大土司空冬官主知  
水土殃咎掌度地居  
民相景之職土司公  
執役之民也蓋屋主  
營建宮室工師之事  
土公吏其屬也



左轄

軫

右轄

土司空



翼

翼天子之樂府軫主  
車騎任載器府百工  
居肆以成其事者司  
空掌邦土翼軫器府  
皆其所掌故土司空  
係焉然工有大小不  
同室下司空主工師  
匠氏上木大役軫下  
司空則梓人與人之  
事而已



府

空之為言空也相天下之大勢擇其空缺之處而修治補助之故天文室壁之未有土司空一星土公二星主知水土殃咎周官之職曰司空掌邦土居四民時地利記曰司空度地居民使地邑居民必參相得無曠土無遊民司空之職莫大于此蓋司徒掌其圖數而司空治其工程司空建其始而司徒守其成此其聯事若此而後人遂欲以相併也然則冬官之屬當其掌大均之事如地官之徙民宗伯之聯衆又當

有善景相觀卜以經營疆理于四方如詩稱召伯之  
世執其工燕師所完者且天垂象聖人則之室壁閣  
道星宿燦然皆天之垂象也如百工之事惟土木為  
大故蓋屋二星土工吏二星列象于營室之下又百  
工居肆以成其事故土司空四星列象軫翼器府之  
下以冬官而言當有工師以統造諸工又當有梓人  
以統制器百工是考工記之事虞書所謂共工也夫  
共工者誠冬官之事但其一屬耳故取之以入冬官



則可用之以補冬官則不可茲以天象之有關於冬  
官者而參互之亦可見其大端矣

五聖制器尚象圖



離上  
離下

離

包羲氏罔罟取諸離



震上  
震下

益

神農氏耒耜取諸益



震上  
震下

噬嗑

市取諸噬嗑



乾上  
乾下

乾

黃帝堯舜衣



坤上  
坤下

坤

裳取諸乾坤



坎上  
坎下

渙

舟楫取諸渙



震上  
震下

隨

服牛乘馬取諸隨



坤下  
震上

豫

門拆取諸豫



艮下  
震上

杵臼取諸小過



兌下  
離上

弧矢取諸睽



乾下  
震上

棟宇取諸大壯



巽下  
兌上

棺槨取諸大過



乾下  
兌上

書契取諸夬

楊誠齋曰自斯人之饑而未知佃漁也聖人於是乎  
作網罟自斯人之肉食而未知粒食也聖人於是乎

作耒耜自斯人之食貨或有餘或不足之偏匱也聖人於是乎作市易自斯人之寒而衣皮未知織絰之製也聖人於是乎作衣裳自斯人之出入尼於川隔而道斷也聖人於是乎作舟楫自斯人之疲於負擔而艱於遠塗也聖人於是乎作輪轡自斯人之虞於寇攘而懈於守禦也聖人於是乎作關柝自斯人之知有耕耨而未知舂揄也聖人於是乎作杵臼自斯人之無爪牙以自衛而憂於搏噬也聖人於是乎作

孤天自斯人之穴處而病於濕蟄也聖人於是乎作  
宮室自斯人之死而戚於藁裡之掩也聖人於是乎  
作棺槨自斯人之窮於結繩而相欺無籍也聖人於  
是乎作書契然非聖人之私智也取諸十三卦之象  
而後為亦非一聖人之能為也歷乎五聖人而後備  
易繫辭曰以制器者尚其象又曰見乃謂之象形乃  
謂之器右十三卦聖人制器尚象之事也器無窮卦  
象亦無窮豈特十三卦為然哉夫子特舉此以發其

例耳觀此則聖人之用易也豈盡假卜筮以用之而  
卜筮一端亦豈足以盡易也嗚呼形而上者謂之道  
形而下者謂之器道器非二也吾人日用間何往非  
象何往非器果能象事知器乎抑亦得心忘象而與  
道俱乎善用易者可以自省矣



# 楚丘定之方中圖



定北方之宿營室星也此

星昏而正中夏至十月也

建亥月小雪

中氣之時

於是時可以

營制宮室故謂之營室衛

為狄所滅文公徙居楚丘


營立宮室樹八尺臬而度

其日出入之景以定東西又

參日中之景以正南北也



# 公劉相陰陽圖



歷代立八尺之表以量日景故表短而晷景短尺寸易以差元朝立四丈之表於二丈折中開竅以量日景故表長而晷景長尺寸縱有毫秒之差則少矣


元朝立簡儀為圓室一間平置地盤二十四位於其下屋背中開一圓竅以漏日光可以不出戶而知天運矣古法以五表求地中以今思之惟用一表其表與人齊高當午日中畫其短景於地以為指北準繩置窺筒於表首隨準繩以窺北極若見北極當筒心

則其處為得東西之正或窺見北極之東則其地偏東窺見北極之西則其地偏西矣既得東西之正乃於二分之一前十日內就其處置壺漏定十二時以兩日午中短景求與時參合於春分前二日或秋分後二日日正當赤道之際於卯酉中刻視其表景畫地以定東西準繩若卯酉兩景相直而不偏平衡成一字則南北正中矣兩景或曲而向南則其地偏南或曲而向北則其地向北矣此法蓋以午景與北極定

東西之偏正又以東西之景定南北之偏正測驗之  
最精者也



召 誥 土 圖



東表去日近每日後景方中

南表去尤近正晝臨表上故

景短

中表每正晝

景與土圭等

西表去漸遠每日未中景已中

北表去尤遠每日中景已過

凡地偏於南多暑偏於北多寒偏於東多風偏於西多陰唯中得天地之正陰陽之和

大司徒以土圭之法測土深正日景以求地中日至之景尺有五寸謂之地中天地之所合也四時之所交也風雨之所會也陰陽之所和也然則百物阜安乃建王國焉制其畿方千里而封樹之

按洛誥所謂自服于土中蓋以自三代以前則洛為中國之中以今天下觀之則南北袤而東西蹙則其

所謂中者蓋在荆襄之間也朱子曰豈非天旋地轉  
閩浙反居天地之中閩浙乃東南海盡處難以爲中  
朱子蓋以聲明文物通論天下非論地勢也

### 土圭法

自伏羲造蓋天而土圭之制已寓至周公稽日景而  
土圭之名始立迨虞氏用九尺表而土圭之用始驗  
其所謂土圭者所以求土地之中而稽日景之永短  
也是故掌以司徒崇地官也縣以陽城辨中域也立



表於夏至之日示相等也置圭於晝漏之半取中正也然則天地之所合四時之所交風雨之所會陰陽之所和不以土圭驗之其可哉要必置中圭而後可以測日之中置南圭而後可以測日之南置北圭而後可以測日之北置東圭而後可以測日之東置西圭而後可以測日之西否則不足以辨千里之景也必於平地立南表而後可以測南土之深望北極立北表而後可以測北土之深於東方立東表而後可

以測東土之深於西地立西表而後可以測西土之  
深於南表影末立中表而後可以測中土之深否則  
不足以辨五方之正也由是而推證之於天則為春  
為夏為秋為冬驗之於地則或東或西或南或北質  
之於人則多暑多寒多風多陰舉造化之大皆不外  
於尺有五寸之制又奚必候氣於緹室占象於渾天  
定晦朔於莫莢哉蓋天地之升降不過三萬里自地  
以至日不過一萬五十里圭之景苟差一寸則地差

千里宜矣故古人置五土圭而皆以千里為證是必有高天下之見


今之地中與古已不同漢時陽城是地之中宋朝岳

臺是地之中

岳臺在浚儀屬開封府

已自差許多

周土圭式樹臬圖



大司徒以土圭之法測土深正  
 日景尺有五謂之地中凡建國  
 以土圭正其地而制其域  
 典瑞土圭以致四時日月封國  
 則以土地  
 候日出之影度其臬端以知西  
 候日入之景度其臬端以知其  
 東  
 晝日參其臬影之最短處為日  
 中以望其臬端則是正南夜于  
 臬南以望臬端考之極星則是  
 正北蓋極星居北不移故取正  
 北

周禮匠人置臬以度日影辨方正位之法

水地以垂謂先以水平也高下四方皆平乃于營造處四角立四柱于四柱用垂繩以正柱柱正然後以水平之法遙視柱高下高下定則知地之高下然後平高就下則地乃平也

置臬以垂眦以景臬柱也于所平之地中央樹八尺之木以為表表界其四面之中又四稜垂八繩以等之繩皆附表則正然後視表之景表必八尺者日

從上向下八萬里故以八尺為法

歷代立八尺之表以量日景表短而晷景短尺寸易以差元朝立四丈之表于二丈折中開竅以量日景故表長而晷景長尺寸縱有毫秒之差則少矣

元朝立簡儀為圓室一間平置地盤二十四位于其下屋背中開一圓竅以漏日光可以不出戶而知天運矣

工總考

舜典帝曰疇若予工僉曰垂哉帝曰予咨垂汝共工  
垂拜稽首讓于殳斨暨伯與帝曰兪往哉汝諧帝曰  
疇若予上下草木鳥獸僉曰益哉帝曰咨益汝作朕  
虞益拜稽首讓于朱虎熊羆帝曰兪往哉汝諧 按  
工之官缺則民用不周虞之官缺則物生不遂故舜  
視百工萬物皆予一體故皆曰予而虞工列于九官  
自古重之矣周禮屬虞衡于夏官今則并山澤虞衡  
統屬之于工部益垂猶且讓之任是職者可輕視之


哉


周禮冬官其屬有考工掌百工之事曰國有六職百工是其一焉漢成帝初置尚書有民曹主凡民上書後漢光武改民曹主繕修工作鹽地園囿魏置左民尚書亦領其職晉宋以來有起部尚書而不常置每營宗廟宮室則權置之事畢則省以其事分屬都官左民二尚書北齊起郎亦掌工造屬祠部尚書後周有冬官大司空卿掌五材九範之法其屬工部中大




夫承司之事百工之籍而理其禁令至隋乃有工部  
尚書統工部屯田二曹蓋因後周工部之名兼前代  
起部之職唐龍朔二年改工部尚書為司平太常伯  
咸亨元年復舊宋則工部判部事一人以兩制已上  
克凡城池土木工役皆隸三司修造案本曹無所掌  
元豐官制行尚書工部掌天下城池宮室舟車器械  
符印錢寶之事與山澤溝洫屯田之政令焉

城制





# 營國九州經緯圖



量人掌建國之  
 法以分國為九  
 州營國城郭營  
 后宮量市朝道  
 巷匠人營國九  
 旁三門國中九  
 經九緯經塗九  
 軌左祖右社市  
 朝一夫疏曰  
 賈氏典命疏曰  
 天子城方十二  
 里公宜九里侯  
 伯宜七里男  
 宜五里

按營國每旁三門城郭各十二門城內縱橫大道各二界為井字中之州有九其餘道塗九經九緯各有區城中為王宮前朝後市左祖右社凡制禮大物不過十二賈氏之說得之匠人云九里蓋有闕誤不足為據然所謂十二里者必以道計四面皆如其數然後可以容百官府之次舍賓客之旅寓工商之廛肆苟以方計之則每面止三里尚足為王者之都乎

都邑制度

古者建國必先于辨方正位是以匠人置槷臈景必  
正地中以天地之所合四時之所交風雨之所會陰  
陽之所和然後建王國也匠人營國方九里旁三門  
國中九經九緯南北之道為經  
東西之道為緯經涂九軌左祖右社  
前朝後市市一夫百畝之地方  
足以容之其制大畧如此然必  
有土方氏掌土圭之法而大司徒又掌其凡蓋重其  
事也而建都之本則更有在焉周禮曰惟王建國辨  
方正位體國經野設官分職以為民極蓋王基立而

後根本定方位設而後等級明國野分而後疆理正  
官職舉而後綱目張凡以為民立極也昔人有言曰  
京都為四方之極猶紫辰為周天之極然京都固為  
四方之極而帝王又以建惟皇之極也則宅中圖大  
以定四海之民者固自有本矣

古室制圖

北

室東為東房

東

窗

突戶

即屋漏

牖

西

室西為西房

南

東房之南通為堂

按室南為堂

堂之中為兩

楹之間戶牖

之間謂之依

西房之南通為堂




爾雅釋宮曰西南隅謂之奧西北隅謂之屋漏東北隅謂之宦東南隅謂之窔邢昺曰室中四隅之異名也賈公彥曰室中謂四壁之內朱子曰廟室之制皆如此

按朱子殿屋說殿屋五間前皆為堂中間後為室又釋宮文曰堂之室南北五架北兩架之間為室則室止一間而當兩架之中其地甚窄意者朱子舉此以見例耳其實古之為所謂巨室者東西不止一間而

南北不止兩間也



# 寢廟辨名圖



爾雅曰室有東西曰廟無東西廂有室曰寢西南隅

謂之奧西北隅謂之屋漏東北隅謂之窻

盈之反

東南

隅謂之窻

一弔反

東西牆謂之序牖戶之間謂之扃宮

中之門謂之闥門側之堂謂之塾廟中路謂之唐堂塗

謂之陳

唐與陳皆堂下至門之徑特廟堂異其名耳

又曰秩

于結反

謂之闕

張謂之楔

革鎔反又先結反

楸謂之闌

魚列反

蓋界于門者秩

也亦謂之闕旁于門者張也亦謂之楔中于門者楸

也

楸巨月反

亦謂之闌士喪疏云房戶之外由半以南謂

之堂士昏疏云其內由半以北亦謂之堂堂中北牆  
謂之牖士昏尊于室中北牖下是也堂下之牆曰壁  
士虞饗饗在東壁是也牖有東牖西牖士喪疏云堂  
隅有牖以土為之是也塾有內外士冠註云西塾門  
外西堂是也月令曰其祀中霤燕禮設篚當東霤此  
言諸侯四注屋之東霤又有門內霤燕禮賓執脯以  
賜鍾人於門內霤是也




# 天子寢制

東九為雄丈七  
西七為雄丈一  
北七為雄丈一  
南七為雄丈一

小寢


室居二雄



宮人掌王六  
寢之修為其  
井匡除其不  
蠲去其穢惡  
註路寢一  
小寢五  
戶牖之間謂  
之宸兩階之  
門謂之鄉度  
之左右謂之  
位門屏之間  
謂之中



# 皋門應門圖




大雅云  
迺立皋門  
應門有伉  
將迺立應  
冢土戎醜  
攸行

圖 之 市 廛

民居	市	民居
民居	王宮	民居
民居	宗廟 社稷	民居

此都邑之市亦以井田為規  
 其中為王宮其前為朝左宗  
 廟右社稷其後為市四面皆  
 有門市賈百物至皆貿易而  
 市官為之治其爭亂并譏察  
 異言異服之人市地為廛買  
 易者所居也其外六區皆民  
 居四十家共一區凡百畝所  
 謂二畝半在邑也蓋廛有義  
 賦其田也謂市地之賦稅也  
 受一廛者所居廛市之地此  
 言其規模之大畧也

廬舍之圖



此一夫所受二畝半在田  
宅也春夏則出於田因以  
治田秋冬則入居於邑以  
為安也居之宅四圍墻下  
則樹桑以供蠶事其餘空  
地則種麻以為布疋及蔬  
菜之類蓋在野則八家共  
二畝十畝而二畝半在田  
邑則四十家共百畝而二  
畝半在邑也

邊方堡制議

堡制者非無制之難也能全其制之難也夫善守者  
因天之財就地之利故敵有不攻藏於九地之下古  
人曰收其伍全遠其五敗又曰濶與上倍高與下倍  
今之民堡豈知是哉故三約堡制其目有四一圍垣  
地置既得則圍垣宜講也大小不限曲直無拘但取  
內容丁衆外遠俯逼而已然大不如小小則堅直不  
若曲曲則易守故宋藝祖筆塗趙韓王城圖不使端

直金粘沒喝一觀汴城便謂易攻也又古人垣制多以高五丈下濶二丈五尺上濶一丈二尺五寸為式今時民堡則大率高一丈五尺加陴隄為二丈下濶丈餘上濶五六尺而已垣太低則矢石易及陴隄難保近敵攻堡多飛石墜其陴則人不敢垣立而後蟻附以登今制以垣高二丈加陴隄五尺共二丈五尺視古制為半下上收闊亦如之庶中道也二敵臺圍垣既立則敵臺宜講也夫垣之棄守全在敵臺垣雖

方直有臺則守垣雖委曲無臺亦棄然敵臺宜多多則護垣為易宜高則四擊不礙古制謂敵臺高與垣等者以垣高五丈也今垣僅及其半則臺宜加高先年肅敏公論塞垣敵臺曰每一里一臺以為火器所擊不下三百步夫火力縱及豈能一一盡中空過寬來往鮮力矣則又宜加多今時民堡敵臺全不如制受病甚多如角臺本宜平直即以東北角論之則循北垣而東築臺若干丈尺亦當循東垣而北築臺

若干丈尺若欲以垣相附以省工費則附東垣矣不得更附北垣附北垣矣不得附東垣縱使兩垣俱附亦須為臺三四附牆者半專面者倍如以磬直向外磬折向內然者今皆不循垣直出又不以磬直向外但疊土兩垣之間斜附而上地置既繆矢道皆斜臺以塞垣而矢石不及何以為守又一面止築一臺夫臺之多寡以堡之大小為之堡大則多堡小則少大抵兩空不得過五十步又堡有垂角而出縮腹而入

者亦須量勢為臺必使相及今一面止築一臺不論遠近出入矢石縱及亦弱而無力倏忽之間為敵乘矣又高與垣等而收頂不及一丈夫垣陴恒為敵墜者垣低石可及也今臺高與垣等則臺陴亦不易呈收頂止一丈所容寧幾人發天發火器何以展布又臺陴不五六敵以兩弓注一陴則臺人不敢伸首出望與無臺等矣此皆害人之大者今制臺高三丈高于垣一丈收頂方二丈皆東南直出陴牆至三尺而



止順立柱木二尺餘上加橫木復為牆尺許中空遍置木牌外為附眉內加轉撥或開或閉惟吾所欲彼注矢于此吾則啟牌于彼夫裨畏注矢以裨無一定也裨啓無常斯不畏注矢矣此專為發火箭與矢若夫礮石則踰牆四出不必凝望忖度也三裨院敵臺既就則裨院宜講也夫垣既不高裨復削薄遇攻則不支其衝竿飛石之往來自守又無以久縣石縣木之上下一有損墜即將以赤身之人立于孤垣之上

聲弦可顛矣邊人曰敵飛石墜陴則以竿裹裹為人形加革帽高揭之以惑人衆見喧曰敵登矣爭先自投敵徐蟻登此陴之害也今民間率用土坯殖土以成曰土

坯又率立植其易墜故宜近有議用磚者磚質狹小

亦與立植與坯何異但多費耳今制必用泥坯水和土模

成者曰泥坯橫卧為陴外以茅泥多入泥以草或麥葉曰茅泥固之庶

堅厚可賴也四甕城陴陴既成則甕城宜講也夫民堡之破半咎于門何者鐵裹以禦火也今鐵葉至薄

不禁薰灼鐵熱木焚為力不難而門上無懸樓以遠  
擊無漏槽以下水嘗計人力擲草幾至十步千人齊  
擲草且成丘發火以焚無不鎔壞門壞則雖有人乎  
垣無及矣故必有甕城高厚與堡同內外俱為陴阬  
旁開一門亦用鐵扇已併廢堡之門取以為用可也  
夫甕城高厚與垣等內外皆陴則雖洞其外門亦無  
敵敢入者而況為重門邪甕城門亦備漏槽下水


# 邊方堡制

角臺圖

舊失

兩垣附上

矢道皆斜



今


制

附東垣不

附北垣

附北垣不

附西垣




循內垣直出


磬折向內直向外

敵臺圖

小堡一面為一臺



大堡一面為二臺




敵臺懸板圖

陣院圖

舊失


今制

仍以茅  
泥固之



甕城圖

小堡有甕城  
面不用敵臺  
大堡仍為之  
甕城不必太  
大大則更須  
角臺



民堡說

昔晁錯為文帝畫備戒之策曰遠方之卒守塞一歲而更不知北人之能不如選常居者家室田作具以備之以便為之高城深塹具藺石布渠谷又曰要害之處通川之道調立城邑毋下十家夫錯通變審機權漢智囊也其所圖畫城垣而已則所謂實勝不為誇辭者與夫自井田之制廢而地險盡夷封建之典隳而兵力大弱塞鄙之地密邇異國吞噬日聞必待



烽火徹于甘泉六軍屯于細柳然後徐興問罪執言  
田禽則塞地赤矣故曰百戰百勝不若先為不可勝  
以待之先為不可勝則城其首務也嗟夫錯之為文  
帝畫也時值其難姑舉其大乃今而用錯畫則時易  
而當致其詳事半而功倍之者也何者楚漢兵爭燕  
代反復漢其時塞口至絕少夫錯首言更踐之無功  
次陳謫戍之賈怨立拜爵之科開贖罪之路多方以  
求懼無人也調立城邑毋下千家慮不守也乃若今

時則生養既久戶田大滋由塞垣以達畿輔林林總總不憂無人也郡邑碁布不憂不守也所慮者村落之民耕作之輩耳徙之城市則奪我農時任其便安則遭罹敵患故必鄉為之堡而家教之守鄉為之堡險在地也家教之守險在人也在地者宜固在人者宜周蓋嘗尤諸前圖事者矣宣德之間邊警絕少塞宜城也而不城成化弘治之間塞田屢減鄉宜堡也而不堡弘治正德之間戎馬擾矣民亦漸為堡矣官

宜為之制也而不制塞宜城而不城則疆場伸縮之間形勢之憾生矣鄉宜為堡而不堡則牧馬數警之後奔命之疲急矣官宜為之制而不制則力徒勞財徒費堡而不實矣凡民圖其近而忘其遠安于常而不知變者也官不為制則冗餘崇雉數丈以為廣剝落以為堅危逼以為安又富者侈其慾貧者玩其期狡者舞其智武斷者逞其僭是故塞下堡無一可式者也道里不干相去之遠近也形勢不干首尾之應

援也丁口不干集聚之衆寡也智勇不干夙昔之遘  
別也古人曰有生地有死地謂其可以生人可以死  
人也然則近日之堡固非生人者與今之言禦敵者  
曰選精銳以衝其中虛是之謂戰城塞垣以遏之境  
上是之謂守而必終之曰堅壁清野夫言戰曰養士  
矣言守曰城塞矣至言堅壁清野則惟付之虛文可  
乎夫民堡不固是壁不堅也敵入有獲是野不清也  
知戰而不知固民堡不植其根而長其枝葉者也知

城塞而不知固民堡不去其餌而欲止魚者也烏可得乎嗟夫欲戰必先擇官欲守必先清野清野必先堅壁一定之畫也城民堡而約之制團丁壯而教之戰以民堡之固不固稽守令保障之功以團丁之精不精察守令佚使之績必使彼至塞不能入也入無所掠也不能入則勞費無所掠則饑疲衝其中虛邀其情歸此其時也或問民堡之制如何曰載在鄉約

長城說

長城之築起臨洮至遼東延袤萬餘里非獨秦始皇  
築也昭王時已于隴西北地上罷築長城以備邊矣  
亦非盡秦築也起自代並陰山下至高闕為塞燕自  
造至襄平亦皆築長城矣秦之後若魏若北齊若隋  
亦皆築焉蓋天以山川險隘限南北有所不足增而  
補之亦不為過且有為民之意存焉使後之人懲秦  
人起閭左之失慮蒙恬絕地脉之禍而廢其已成之  
功非計也但內政不修而區區于外侮之禦乃至乎

竭天下之財以興無已之功則不知所務耳



圖書編卷一百二十四

欽定四庫全書

子部

圖書編卷一百二十五

詳校官中書臣孫衡

主事臣祁韻士覆勘

總校官進士臣朱鈐

校對官編修臣秦瀛

謄錄監生臣許思光



欽定四庫全書

圖書編卷一百二十五

明 章潢 撰

開浚田畝水利總叙

昔人有言積貯天下之大命而軍國之需必資焉王  
制曰三年耕必有一年之食九年耕必有三年之食  
是貯積之道也然所以致之者豈無其道哉有田畝  
以率甸人有匠人以治溝洫有遂人以興水利有稻

人以祛水害是故田野之所由闢而積貯之所由充也井田既壞此法不傳蓋自漢唐以迄于今日而公私之積皆可哀痛矣邇年以來蘇松之水溢為巨浸江浙之旱赤地千里一苗半穗民命盡矣兼之以貪墨之侵漁豪強之兼併緇黃之靡食賦斂之峻削門攤之稅十室九空隸卒所過鷄犬亦索東南民力困竭甚矣則大運削弱之患供輸逋負之狀其敝不惟在民生而且移之國計矣思患預防者可不通變以

宜民乎何則揚州之域厥田下下厥土塗泥而今財  
賦乃至甲於天下者以民事勤而庶功興也昔人有  
言東南有可耕之人而無其地西北有可耕之地而  
無其人則夫西北之地古之中原地非不可耕也但  
人力不知奮耳誠能稽元學士虞集之議而於河南  
山東陝西諸省長川廣野可以開溝洫而蓄洩其水  
畫經界而原隰其田成菑畬而稼穡其利者因而  
用之或召募異地之人給其牛種而寬其租賦或留

休尺籍之兵立之屯營而儲其糗糧則通東南之漕  
運以給太倉者常也斂西北之粟以足邊儲者權也  
所以濟漕運之所不及也雖然天下之事建議者思  
之非不周而執事者行之未必力方集議開京東瀕  
海之田而極施為措置之詳其法非不鑿鑿可行也  
而肉食者鄙竟以浮言沮之卒之至正間海運不繼  
燕京乏食宰臣議行僅以紓一時之急而國之成敗  
莫之有救豈議論多而成功少集之言有不足用歟

無亦主之者無其人也昔賈讓治河之策固曰不與水若爭咫尺之利則夫今日之治田也其可與土地爭利乎誠能擇通敏練達之臣委任而責成之許以便宜不撓之以文法遲以歲月不責之以旦夕不為羣議所搖不為流言所惑捐內帑而不之惜召民怨而不之顧舊堰可增也則任其增而不撓于中制新河可開也則聽其開而不請於上裁則撓堦之地皆可田灌莽之區皆可稼矣然又必不亟其利初所入

者予之民而不爭二三年後始籍而賦之則民知利之所在咸爭先而趨之矣丘文莊之議載於衍義補者可考也夫開西北之田以資積蓄固所以紓東南之困也然東南水利其可不思所以興之乎東南水害其可不思所以去之乎故今董治農政非無通判也而未嘗聞其有勸相之方提督水利非無憲臣也而未嘗聞其論疏濬之術則遇旱而無所蓄遇澇而無所洩凶荒之故恒必由之誠使知水政者如劉彝

其人興陂塘者如孫叔敖其人則東南之凶歉可免  
矣







# 園田圖

水田圖

圖書編

五





圍田築土作圍以繞田也蓋江淮之間地多藪澤或  
瀕水不時滄沒妨耕種其有力之家度視地形築土  
作堤環而不斷內容賴畝千百皆為稼地後值諸將  
屯戍因令兵衆分工起土亦一此制故官民異隣復  
有圩田謂疊為圩岸扞護外水與此相類雖有水旱  
皆可救禦凡一熟餘不惟本境足食又可贍及隣隄  
實近古之上法將來之永利富國富民無越於此  
水閘開閉水門也間有地形高下水路不均則必跨

津要高築堤埧匯水前立斗門甃石為壁疊木作障以備啓閉如遇旱涸則撒水灌田民賴其利又得通濟舟楫轉激碾磴實水利之總揆也

周禮以潴蓄水以防止水說者謂潴者蓄流水之陂也防者潴旁水之堤也今之陂塘既與上同考之書傳廬江有芍陂潁川有鴻隙陂黃陵有雷陂愛敬陂陽平沛郡有鉗盧陂餘難徧舉其各溉田大則數千頃小則數百頃後世故跡猶存因為利今人有能別

度地形亦效此制足溉田畝千萬比作田園特省工費又可蓄育魚鱉載種菱藕之類其利可勝言哉

### 治水諸器

治水諸器十有三曰鐵簣箕曰五齒爬曰杏葉杓曰攪江龍曰方船曰水車曰戽斗曰泥攪曰泥筐曰鐵鋤曰竹簣皆舊制也曰活閘曰刮板余新制也然皆可深閘河耳而深黃河之法可以制勝之乎鐵簣箕重艱不可用五齒爬可搜泥根杏葉杓可滌於泥攪

江龍急水可偶一為之多弗效方船利於載石撈泥  
水車大利於乾漕北人不能用戽斗利於挹水南人  
不能用泥橈以布為之二人共舉煩難可厭泥筐以  
擔貫之一人獨舉用人少而盛工多利器也恨北人  
不習鐵鋤利器也南北通習之竹簍水中夾泥唯高  
寶湖中能用之活閘以板為之遇閘河淺則施有石  
閘之用可移而置也刮板施於淤沙之淺一刮可去  
沙數斗二器大利閘漕云

治槽之淤有二法遇淤泥之淺利用爬杓不利於刮板遇沙淤之淺利用刮板不利於爬杓

岸塍

岸塍所以圍田也即一方而他方皆可以例推矣

國家倚辦東南財賦而蘇松之賦又甲於東南顧地處下游古號澤國蓋平時既雜受杭嘉昆陵諸路之水而湖沙往來之處浦塘又多壅塞故時雨淋漓輒駕堤上而濱湖近海之處被害尤劇此豈獨不浚灑之故哉亦以障捍之無策也蓋有司既困於簿書期

會之繁又格於因循積習之論故於水務每疏濶不講至於岸塍雖亦業田者修築然人情恒慳一時小費而不顧異日大害乃多虛應故事夫岸塍當平時風浪之衝激侵蝕既已不鮮迨經霖雨則連絡盡圯而牆夫束手號籲無門矣故當事者首務須在經理幹河之大且要者其次則疏支渠築圍埂急焉檄郡縣修築必嚴厥令必責厥成相機宜授方畧視窳隆準事物計田授役而公家亦資以錢穀其為岸必高



與廣等上廣若干而下內外各加三之一其當鑿而易潰者則斷木為楹甃石為址必期於雄固而後已如是而又歲歲修之俾勿壞則水潦有備而沮洳之區可與沃壤並矣苟徒曰理河道足矣而於岸塍漫不加意則雖得之於河而終失之於堤埧歲疏濬諸塘浦後而水患頻仍病民虧國其效可覩矣此豈備災萬全之策乎夫國需取辦常在目前而里閭利病常在千萬里外苟不悉圖所以備災者而徒一切責


賦於受災之民則百姓抗弊何時可夷而軍國儲蓄  
亦何能常足也故於溝洫之外復著岸塍之說蓋詳  
於人之所易忽以備水利者採焉

浚渠圖

大邑縣志

圖書編

十



浚渠

浚與濬同開治也隅也

凡川澤之水必開渠引用可及于田考之古有溝洫畎澮以治田水書云濬畎澮距川是也逮夫疏鑿已遠井田變古後世則引川水為渠以資沃灌按史記秦鑿涇為渠又關西有鄭國白公六輔之渠外有龍首渠河內有史起十二渠范陽有督亢渠河北有廣戾渠朗州有右史渠今懷孟有廣濟渠俱各溉田千百餘頃利澤一方永無旱暵所謂人能勝天豈不信

哉後之人有能因其地利水勢繼此而作益國富民  
可見速效凡長民者宜審行之

論浚渠築堰

禹之治水不過曰決九州距四海濬畎澮距川而已  
而天下之言智者莫踰焉何哉洪範五行水曰潤下  
知水之性潤下則知禹之治水矣是故先決九州以  
導於海使水之大者有所歸次濬畎澮以距於川使  
水之小者有所洩此所以九州同四隩宅而萬世永

利也商之衰也五行之官世失其業周人始命遂人  
十夫為溝百夫為洫千夫為澮萬夫為川而溝洫之  
制始立稻人以潴畜水以防止水以溝蕩水以遂均  
水以列舍水以澮瀉水而溝洫之制益詳至於匠人  
氏又辨其深廣之度而通其蓄洩之宜其法可謂盡  
善矣然周人豈夷陵谷而為之哉亦不過因其自然  
之利而修伯禹之故而已周之衰也遂人稻人匠人  
之官又世失其業列國之君皆自利以病隣國暴秦

之興又廢溝洫開阡陌而水利廢矣是故孫叔敖起  
芍陂則楚受其惠文翁穿決口則蜀以富饒史起鑿  
漳水於魏則鄴傍有稻梁之詠鄭國導涇水於秦則  
谷口有木杲之謠許景山復蕭何之故堰則興元之  
荒瘠復為膏腴趙尚寬修召信臣之故渠則南陽之  
瀉鹵變為沃壤之數君子者孰非因其自然之利而  
修其已然之法哉謂之得周官之遺意亦可也伏惟  
我國家司空有總職水利有專官省以督之府府以

督之縣而縣之陂塘圩堰又莫不有長重以憲臣之稽察皆以愍惠元元而興水利也然遇水旱民輒告病者是必有其故矣此無他陂塘圩堰之長皆失其業而郡縣長吏又莫之省憂故也欲修周官之職加疏濬之功通灌溉之利絕湮沒之患甚盛心也愚則以為周官之職不可卒復而溝洫之遺意尚亦可尋周官曰溝必因水勢防必因地勢蓋溝以導水不因水勢則其流易壅防以止水不因地勢則其土易壞



為今之計莫若申飭郡縣長吏督率陂塘圩堰之長  
察水勢之曲直原地勢之高卑可堤則堤可決則決  
因陂塘圩堰之舊加疏濬築塞之功而又嚴侵占之  
禁明考課之法則灌溉之利興漂沒之患免矣雖然  
賈讓有言曰立國居民疆理土地必遺川澤之利分  
度水勢所不及大川無防小水得入陂障卑下以為  
圩澤使秋水多得所休息左右游波寬衍而不迫此  
誠萬世水利之上策



治河治田相表裏圖

治河

溝洫修廣則夏秋霖潦有所容納  
可免震盪衝激之患而河治矣

平西北之大患莫急於治河興  
西北之大利莫要於治田惟盡  
治溝洫力溝洫則治河治田興利除害

一舉兩得且可禦北方之突騎

紓南方之漕粟矣

治田

溝洫修廣則源泉雨澤有所注蓄  
可免早乾水溢之虞而田治矣

治河壅田疏

御史用周言治河壅田事相表裏田不治則水不可  
治蓋田治而水治矣古今稱聖人之治水者必曰大  
禹禹治水莫大于河自告厥成功之後至周定王五  
年而河乃徙自龍門至於碣石入海不為中國害者  
一千七百餘年宜其功施未易名狀然禹之自言則  
曰予決九州距四海濬畎澮距川至孔子稱禹亦惟  
曰盡力乎溝洫而已然則歷千七百年而河不為中

國害者實大禹盡力溝洫之賜也故自禹至殷盤庚  
五遷厥邦以避河圯溝洫小壞矣然猶未徙也至定  
王時而徙溝洫加壞矣然猶未決也至秦廢井田開  
阡陌而溝洫掃地矣秦祚不延及漢而河決酸棗決  
瓠子歷漢而唐而宋元源河徙決不可勝記治河費  
歲以若干萬計其治塞之而已溝洫之政無聞焉今  
自黃河言之每歲春冬西北演迤而來固亦未害逮  
夏秋霖潦時至吐洩不及震盪衝激莫斯為甚夫以

數千里之河挾五六月之霖潦建瓴而下乃僅以河  
南開封之渦河與直隸徐州州縣數百里之河東而  
委之唯其不遭橫決者幸而已矣夫今之黃河古之  
黃河也今自陝西西寧至山西河津所謂積石龍門  
合涇渭漆沮汾沁伊洛瀍澗諸名川之水與納每歲  
五六月之霖潦古與今無小異也何獨大禹能使之  
安東北之故道歷千百年而不壞後世曾不能保之  
於數年之間此其由於溝洫之不修大較然矣陛下

受養元元無所不至墾田勸農之疏屢蒙俞允則今日肇修溝洫之政以繼神禹平成永賴之功臣實望焉且黃河所以有徙決之變者無他以水未入海而霖潦無所容也天下皆有溝洫則天下皆吞水之地天下皆修溝洫則天下皆治水之人水無不治則田何所不墾是一舉而興天下之大利平天下之大患也今河南州縣被衝決者隴畝淤墳耕者不得種種者不得收而科催額稅如故中土之民困于河極矣

至運河以東濟南東昌兗州三府州縣雖有汶沂洸泗等河與民間田地支節脈絡不相貫注每年泰山徂徠山水驟發漫為巨浸潰決城郭漂沒廬舍與河無異或值旱暵則又無可修繕陂塘渠堰蓄水以待急遂致齊魯之間方四五十里之地一望赤地蝗蝻四起草穀俱盡此皆溝洫不修之故也使溝洫既修又寧患此今欲修溝洫之政非謂一一如古也但各因地勢水勢之宜縱橫曲直隨其所向自高而下自



小而大自近而遠盈科而進委之海而已遠謀不可  
以倖致美功不可以雜施孔子曰無欲速無見小利  
今莫若正疆理以稽工程集人力以助夫役蠲荒糧  
以復流移專委任以責成功持定論以察羣議毋以  
欲速而輒更張毋以小利而生阻撓則治河裕民之  
計也所謂正疆理以稽工程者蓋疆里不正則規模  
不立脈絡不貫而彼此相病合行司府州縣規畫立  
界先因通流畫為大渠多者五六少者三四次因頃

畝畫為中渠小渠而又計其工程之難易土壤之生熟夫役之多寡錢糧之盈縮期會之後先為三年規大畧初年疏大渠會于諸河次疏中渠達于大渠又次疏小渠達于中渠其淺深濶狹各因水勢縱橫曲直各因地勢中間卑窪特甚不通轉折之處則疏為塘樂於溝洫之間水滂則趨平旱暵則節蓄經畫既定造成疆里圖冊上之下令如式施行責其成效可也所謂集人力助夫役者大約大渠用官夫小渠用民

夫官夫專開水道為之經民夫各治其田為之緯乞  
行河南山東直隸問刑官除特旨并情理深害免死  
充軍外其餘少做宋人民屯之法隸其名於附近衛  
所而屬之有司責令開渠并墾除糧荒田自給口糧  
三年之後量徵屯糧若會赦願附籍佃前田為永業  
者聽其府州縣徒罪發配人願贖者俱令以官夫開  
渠徒以里計杖以丈計隨所犯輕重為放免差次則  
軍犯免衛所凌虐且省軍儲徒罪得以力免贖亦不

廢法外此更清驛傳應付之濫恤貶賠稅糧之苦議  
保馬積習之弊裁里長浮靡之費省民壯團操之擾  
當事諸臣皆相與推廣德意一一行之則溝洫之政  
可舉溝洫既成豈止河患可平民利可興即萬一有  
兵戎之警亦將逡循相顧而不敢橫又推其法於諸  
邊修古人屯田分兵之法使耕者雜於居民之間不  
惟可省餉饋之費溝壘相望所在皆險所謂寓武備  
于農功資人和于地利者也今自近黃河一帶州縣

積年逋欠查理停免而見在積荒田糧穀實開除則  
流移漸復而荒田自墾往年治河任事之臣劉大夏  
等或蒙大發浙江等布政司銀兩或蒙給鈔關抽分  
以備支費莫非因民之財救民之患也今溝洫大務  
誼當不惜小費乞于蠲糧數內通融扣補畧如宋臣  
范仲淹以官糧募饑民修水利之法使官司惠而不  
費百姓勞而不怨溝洫修復則下足民食上給公賦  
皆將沛然而有餘比之俟河決時驅無辜之民傾不

貲之費興再三不得已之役徼萬一不可必之功者  
利害蓋相萬也夫黃河徙決不常捍禦之策言人人  
殊會通河之外謂引沁河謂通衛河蓋皆博採人言  
以求弘濟然開鑿建置之役費率不下幾十萬金即  
令運道既成其張設官府開創閘壩編命夫役必一  
如會通河之故則為費已繁往年工部侍郎劉天和  
奉命治河專意修復故道竟以底績是也至於海運  
之議則既有不必妄議生擾之明旨在了故以遼東

而視海運則當舍危而就安以山東河南而視遼東則當舍遠而就近以北直隸而視山東河南則又當先內而後外誠自內而外自近而遠修溝洫之政使國有十年之積民無墊溺之危以保國家億萬年無疆之安天下幸甚

治田治水議

按古之畿甸數百畝之田必溝數十溝之水必川數大川之水必就窪而為湖溝因水救防因水淫淵因

水磬折而向於矩為湖為渚也湖渚多而天下西北之水不助河而為暴然後數千里中原之地可樹藝而農唐虞之盛由五事宜八風雨暘時若無崩竭淫溢之災無轉漕輸將之費而封禪分畫功臻于永賴熙寧之術也此謂本務

漕河前已類附黃河以別參考而治河則工曹職也故復記之

治河失其故道



按漕河原不用黃河之水惟用洸汶沂泗諸泉之水  
足以濟之渡淮而西皆是清水故名清河正統十三  
年黃河決滎陽衝入漕河潰沙灣以達于海景泰四  
年都御史徐有貞塞之乃分流自蘭陽東至徐入于  
漕河以疏殺之而黃河始來然亦小小與清水合流  
清水七分黃水三分並入于淮至正德六年水勢方  
盛行浸漫而衝洗之矣先是黃河未衝之時清河河  
道皆狹故易充然亦有淺故沿河俱設淺鋪每年轉

運故無滯也後黃河水大來而淺鋪亦設而不用矣  
今觀二洪之舊堤宛然正是先年河道但二洪一向  
黃水浸漫一旦水落石出而清河一帶淺涸人心乍  
見不能無異其實則故河也蓋自淮達濟由會通以  
至衛河一路堤防只恐黃河之水衝入為漕河之害  
今徐州二洪以下一向反用黃河之水而忘其故及  
水不來則用工挑濬以引之日望其來而不可得如  
酒本傷人之物而耽酒者一向沈溺于酒反以酒為

生一不飲酒即欲死矣此非今日漕河之喻乎

論東南水利

禹貢三江既入震澤底定爾雅吳越之間有身區蓋  
鎮常蘇湖七郡之地中含太湖而東漸于海上受杭  
陸宣歙天目諸山之水下自三江洩焉自漢以來咸  
獲其利蓋古人順治之道必觀其源以溯其委上築  
溧陽之間分水銀林五堰以節其流而使發源之水  
得以西決于蕪湖下疏三江而使積集之水得以東

決于漲海故自吳江抵華亭青龍合于三江之水雖有二百八十之遙而上流既迅大海之潮沙不得以障之也夫何唐末東南商販薄木由宣歙以達兩浙廼病五堰艱阻給官中廢則金陵九陽數郡之水不西入于蕪湖而東入于震澤矣至宋慶厯間李禹卿又堤大湖四十里為漕而中截之使湖水不得以東下是五堰既開則來者愈迅湖堤既鉤則去者復緩其勢又惡得不為蔽乎由是三江之水上不受湖流

之衝而下有潮沙之壅于此亦蔽矣單錡嘗言之自  
五堰以至湖堤猶之一身也五堰則首也荆溪則咽  
喉也百瀆則心也震澤則腹也傍通大湖之衆瀆則  
脉絡諸竅吳江則足也今上廢五堰之固下有江岸  
之阻是極其首足塞其衆竅以沃其口沃而下已則  
腹滿而中絕矣其後吳執中邾僑類皆言之而當時  
執政漫不知檢遂使江口為豪強之業江尾為茭蘆  
之區淤田村落無類數計湖日湧而江日廢漸為百

世之患矣我朝永樂間夏元吉以善言水利得蒞茲土一時亦稱底績惜其不念厥本而徒自崑山開下界里掣吳以達劉家河而洩吳江北去之水自華亭開黃浦三泖以達范家浜而洩吳江南去之水至于湖堤之瘡則漫不加意正統間周忱修復三江復以湖沙壅辟成田因循不舉豈知湖堤不去終非利導之原三江不復終非底定之本哉為今之計五堰之復于正德者修其成可也其下委之勢當自吳江以

決其堤自堤以決三江之壅使由華亭青龍顧會諸浦以達于海其他疏淺之處若宜興之百瀆呂城之三堰崑山之至和塘咸復故道則水何患其不治哉  
經理三吳水利圖說

江南水利譬之人身天目首也諸山溪口也本湖其胞腹三江其腸胃海其尾閭也考諸誌載黃浦即東江之別名劉河即婁江之舊迹併吳淞為三江吳淞西連太湖東通大海江流迅駛唐以前未聞有水患

後吳江長堤一築腸胃始失其利國初以來水患轉亟而夏忠靖公乃專力于夏駕新洋一時大有所裨其後新洋港水勢湍悍日就深濶而吳淞江之氣脉漸微矣土人以此稱為漫水港云夫江流迂緩既無以蕩滌潮沙而新洋夏駕倒注之潮復與東來之潮相會合合則停停則淤江之旋塞有由然也某恪遵廟算廣集衆思咨訪機宜究極形勢乃知併益為災由于源之未節江之併行而至于相奪則以流之未



得所歸也於是闢治江中壅塞四十餘里以復吳淞江之故道決去吳江灘漲數十處使大湖積水直注于吳淞濬淞之山涇等港秀川官紹鹽鉄浦淮六石硎等塘洩澱泖之水于黃浦濬蘇之吳塘顧浦戚虞涇南北橫漑等處洩崑太倉諸水于劉河復濬七浦梅林等塘使陽城巴城諸湖之水徑入于海濬白泖福山三丈諸浦九里青陽山塘雷溝等河使尚崑湖毘陵晉陵諸水徑入于江皆所以導其流也濬白鶴荆

城港西汎裏河洩長蕩荆溪諸水入于運河濬武進之水於孟瀆丹陽之九曲河丹徒之鉄猫港洩潤州上流之水亦入于大江皆所以節其源也源流各得其所然後于十墩堡南濬澱山湖口使湖水通徹入于吳淞又慮江水外逸乃於夏駕及漫水江口並建一閘隨時開閉庶幾水不外趨潮不倒注吳淞可保無虞

伊洛水田議

河南本有水利可以興水田古之人蓋嘗為之矣如  
太陽三渠去府城南十里而近分洛水以溉田者宣  
利渠去永寧縣南三里而近又有新典萬箱等渠皆  
亦分洛水以溉田者伊陽渠去嵩縣東十里而近永  
寧渠去嵩縣南六里而近又有鳴臯順陽濟民等渠  
皆分伊水以溉田者而盧氏縣之東澗水則嘗析而  
為渠流入于城中以灌蔬圃者也可以灌蔬圃則亦  
可以灌田興水田之利也至於伊洛漚澗載在經史

流經府城外夏秋間每泛溢而東者寧不可以隄障  
之車戽而耕種為水田乎予嘗舉其說以告東穀孫  
公公言不可蓋其人習於種旱穀憚于胼手胝足之  
勞而又不諳埂塍之制不慣於栽插耘耔之方術也  
聞永寧嵩縣亦已有水田其民頗稱饒裕予方欲募  
召能作水田之人於我蘇松及永寧嵩縣之已有成  
效者以分教乎凡伊洛三川之民興杭稻之利於此  
一方而惜乎不久即遷官去八閩矣洛民每苦糧重

疏欲與汝南道丈地而均糧格不行予嘗為之請輕折而方伯公靳不許每歎之倘水田之利成每畝可收穀三四種其每畝所上糧一斗比之我蘇松猶為輕則爾即不盡水田也以水田與不水田相參錯為輕重數年以後歲稍多收民間亦或稍致饒裕如永寧嵩縣也糧則稍重於輸將不為難亦何至強聒於人前仰人鼻息而不蒙一許可也歟予請輕折而不得欲興水田以利氓民而以轉官去不獲遂予心又

以為大夫士亦安於故常而不樂為此也每每嗟歎之且著議以告後來者

淮鳳墾田記

臣愚伏見皇上留心吏治加志窮民獎賞來朝官員則親發玉音諭以愛養百姓慮有司催科稍急則勅下戶部蠲免閭閻宿逋孜孜講求惟欲康阜兆民永固國本甚盛心也臣智識淺陋不能仰贊萬分之一思得往年出守廬陽嘗巡行阡陌勸民開塘蓄水招

集流移開墾荒蕪頗覺有益又嘗往來鄰境鳳淮兩  
府之間習見地廣人稀一望數十里皆紅蓼黃茅大  
抵多不耕之田間有耕者又苦天澤不時非旱則澇  
蓋雨多則橫潦瀰漫無處歸束無雨則任其焦萎救  
濟無所取資以是饑饉頻仍窘迫逃亡人烟日稀曠  
土益廣此地界連蕭碭汝潁皆多盜之區逋逃之藪  
積久不無隱憂宜得專官教民稼穡招撫流移在世  
廟中業曾專設都御史王璣時值大水浸淫功不及

施輒復報罷臣為督撫時因潁州僉事陞任具本奏  
薦原任知州姚筐或註原缺或另添設專理開荒議  
亦未行然臣竊以關係地方安危時時念之不置近  
復有以此白臣者臣謹以昔時之見參以今日所聞  
竊意必設專官以重責成蓋潁州僉事淮陽副使兩  
道各有兵餉錢糧問理詞訟之責勢不能兼各該有  
司非得監司督責人無畏憚合於淮鳳二府特設一  
僉事擇實心幹濟者畀之專勅給以關防住劄適中



州縣撫按同心重其事各道不得侵其權有司勢豪  
不得撓其法假以歲月不責近功開一頃即一頃之  
利招一民即一民之安三年果有成績進秩而不遷  
再考再進秩久且超遷之其所轄有司即以開墾土  
地招來人民多寡為殿最亦務各久任超遷如是十  
年不臻庶富之效無是理也專官之責其效在廣開  
溝洫夫水土不平耕作無以施力必先度量地勢高  
下跟尋水所歸宿濬河以受溝渠之水開溝渠以受

橫潦之水官道之衝設大堤以通行褊小之村亦增卑以成徑惟欲於道旁多開溝洫使接續通流水由地中行不占平地又度低窪處所多開塘堰以潴水之夏潦之時水歸溝塘亢旱之日可資灌溉高者麥低者稻平衍地多則木綿桑枲皆得隨時樹藝土本膏腴地無遺利遍野皆衣食之資矣其次招恤流移夫良民忍棄鄉土止為無食耕種多荒年宿逋苦追併其勢必不能安其居也今地既開闢夏秋有收不

愁無食鼓動其懷歸之心將受壓為氓之恐後各該  
有司寬慰而安撫之量撥地土處給牛種不得責其  
逋負量寬二三年俟其志定業熟然後起科又或招  
致江南客日或勸諭本土人鄰或審擬徒夫無力者  
令供役開濬有力者出資給食皆僉事可得專行其  
餘未盡事宜悉聽其酌量區畫或者有窒碍難行事  
干題奏者議擬停當徑自請旨施行既無掣肘之虞  
民心莫不歸向而展布無難矣臣芹曝微忱冒昧瀆

聞伏乞勅下該部再加詳議見諸施行庶幾釀無窮之利於根本之地消意外之虞於未萌之先皇上厚生育物至仁誕敷於窮簷曠土鼓動四方務本力田之風實化導民生之一機也

議興西北水利

客曰子謂經國訏謨其大且急莫有過于西北水利則予之所未解也曰禹功茂矣而濬畝距川廼其盡力而終身者騶孟談王道教樹蓄厥惟先務客惡得

以水利而左之予將為客悉其利夫雨暘在天而時  
其蓄洩以待旱潦者人也廼西北之地旱則赤地千  
里潦則洪流萬頃惟寄命於天以幸其雨暘時若庶  
幾樂歲無饑耳此豈可以常恃哉惟水利興而後旱  
潦有備其利一也神京北輦財賦取給於東南忠於  
謀國者鏡勝國之往事懷和人之隱憂尚有出於河  
流外者惟興水利而西北儲蓄近取常裕視東南為  
外府可也中人之治生必有附居常稔之田始可以

安土而無饑迺國家全盛之勢據上游以控六合獨待哺之東南近廢可耕之田遠資難繼之餉豈計之全哉今運蚤而積久儲蓄信有賴矣然運蚤而收之其熟有浥損之患久積而散之恒過其期有紅腐之憂水利既興則田疇之間要皆倉庾之積其利二也東南轉輸每以數石而致一石民力竭矣而國計所賴欲暫紓之而未能也惟西北有一石之入則東南省數石之輸所入漸富則所省漸多先則改折之法

可行久則蠲租之詔可下東南民力庶幾獲甦其利  
三也昔禹導河入海而溝洫之修尤盡力焉固以利  
民亦以分殺支流而不以助河之虐河之無患溝洫  
其本也周定王以後溝洫漸廢而河患種種矣今河  
自關中以入中原合涇渭漆沮汾沁伊洛瀍澗及丹  
沁諸川數千里之水當夏秋霖潦之時諸川所經無  
一溝一澮可以停住曠野洪流盡入諸川其勢既盛  
而諸川又會入於河流則河流安得不盛流盛則其

性自悍急性悍則遷徙自不常固勢所不至也今誠自沿河諸郡邑訪求古人故渠廢堰師其意不泥其迹疏為溝澮引納支流使霖潦不致汎溢於諸川則並河居民利水成田而河流漸殺河患可彌矣其利四也古人之畫地而田也曰我疆我理南東其畝既順土而宜民亦設險而禦侮也晉之邀齊也必曰盡東其畝以為戎車之利晉之利齊之害也今西北之地平原十里寇騎得以長騎若使溝澮盡舉則田野



之間皆金湯之險而田間植以榆柳棗栗既資民用  
又可以設伏而避敵其利五也往者劉六劉七之亂  
持竿一呼從者數萬則游惰歸之也蓋業農者縻其  
田里惟游惰之民輕去鄉土而易於為亂今西北之  
境土曠而民游識者常惴惴焉誠使水利興則曠土  
可墾而游民有所歸消釁彌亂深且遠矣其利六也  
東南之境生齒日繁地若不勝其民皆不安其土迺  
西北蓬蒿之野常疾耕而不能徧蘇子謂聚則爭於

不足之中散則棄於有餘之外其不均固如此也今若招撫南人修水利以耕西北之田則民均而田亦均矣其利七也東南多漏役之民而西北罹重徭之苦則以南之賦繁而役減北之賦省而繇重也使田墾而民聚民聚則賦增而北繇可輕其利八也沿邊諸境有轉輸不能至者招商以代輸蓋有數頃之田困於一商遂棄業以他徙其有曲避轉輸之苦者則私以折色兌軍商得苟安軍無宿儲即承平勿論設

有烽警何以待之惟近邊田墾轉輸不煩其利九也  
屯田之成熟者多屬隱占久則難稽矣然亦不必稽  
也西北非無田之為患而不墾之患彼既墾而熟矣  
何必歸官始為國家之利哉惟自其荒蕪不理者召  
募墾之則新屯固種種也兵之壯悍者既心恥於負  
鋤而其羸弱者又力疲於荷戈驅兵為農勢固難行  
惟募之農而簡之為兵則心安而力奮屯政無不舉  
矣今天下浮戶依富家以為佃客者何限募而集之

可立致也募農以修水利修水利以舉屯政其利十也塞上之卒土著者少不得已而有募軍則居行給餉為費不貲又不得已而有班軍則春秋遞往疲於奔命又不得已而按籍勾補解檄方登逃亡旋報閭閻重困行伍又虛若近塞水利既修屯政大舉田墾而人聚人聚而兵足可以省遠募之費可以蘇班戍之勞可以停勾補之苦其利十有一也宗祿勢將難繼咸切憂之而莫肯任其議將以難遺後人而後之

難更有甚於今日此不可不亟為之圖也世有勇於  
建議者則曰裁其祿弛其禁而已夫不資之以謀生  
而徒曰裁其祿則饑寒者孰恤不定之以安居而徒  
曰弛其禁則流離者孰依我聖天子睦族展親之仁  
必不忍其至是也昔范文正以兩府祿入尚能廣義  
田以廩族人矧以國家之大而不能使天潢之派皆  
飽食而安居乎今西北之地曠土彌望於其間擇人  
所棄者官為墾闢分井而田如中尉以下量歲祿之

入授田若干使得安居而食其土其後支庶漸繁田不再授蓋既授之以田開其治生之端彼知田不再授則皆及其始授之時勤儉明農於其間以歲食之餘漸墾田而擴產為長子孫之計其雄桀者不失為富家翁即庸拙者亦可以依田力穡其與坐食多餒散處失所者相去遠矣其利十有二也昔之有志者嘗欲倣井田之遺制授民之產而惜其時之不可痛豪強之兼并限民之田而限其勢之難行今若於西

北空間之地修舉水利則倣古井田亦可也限民名  
田亦可也古昔養民之故以漸可舉其利十有三也  
古者以井畫地度地居民比閭族黨井自為界民不  
可多得尺寸之地而地亦不可多得一介之民民與  
地適相均也今通都大邑之民踵接肩摩而爭繁習  
靡多梗化而敗俗其爭少習村者惟寥廓之鄉為然  
今若畫井居民裒益其多寡使民與地均如古比閭  
族黨之意則教化可興而俗尚自美其利十有四也

客曰信如子言水之利溥矣西北皆可行獨先於京東者何居曰京東輔郡而薊又重鎮固股肱神京緩急所必須者矧其地負山控海負山則泉深而土澤控海則潮淤而壤沃利水尤易易也予所屬二三解事者蓋遍歷山海之境閱兩月而返披圖出示如指諸掌也為言諸州邑泉從地湧一決而通水與田平一引而至比比皆然姑摘其土膏腴而人曠棄即可修舉以兆其端者自西歷東如密雲縣之燕樂庄平



峪縣之水峪寺及龍家務庄三河縣之唐會庄順慶  
屯地皆共著者薊州城北則有黃厓營城西則有白  
馬泉鎮國庄城東則有馬伸橋夾林河而下城南則  
有別山鋪及夾陰流河而下至於陰流淀疏渠皆田  
也遵化西南平安城夾運河而下及沙河鋪地方又  
鉄厰湧珠湖下至韭菜溝上素河下素河百餘里夾  
河皆可成田遷安縣北徐流營山下湧出五泉合流  
入桃林河又三里橋湧泉流出灤河又蠶姑廟湧泉

成河與灤河相接夾河皆可田之地盧龍縣燕河營湧泉成河及營東五泉湧漫四出至張家庄撫寧縣西臺頭營河流亦自燕河營湧泉而來皆可田自西以東如豐潤縣南則大寨及刺榆坨史家河大王庄之地東則榛子鎮西則鴉洪橋夾河五十餘里皆可田玉田縣清庄塢導河可田後湖庄疏湖可田二里屯及大泉小泉引泉可田其間有民所不業之地有屯地有牧馬草地屯草之地屬於官官為闢其蕪而

收其利不難也至於民不業者召民業之官為助其  
力何至連阡陌棄鞠為茂草乎至於瀕海可田則自  
水道沽關黑崖子墩起至開平衛南宋家營之地東  
西度之百餘里南北度之百捌拾里皆隸豐潤其地  
與吳越瀕海之沃區相等今崔葦彌懋而繫名於勢  
族然葦之利微即勢族亦無厚入於其間也若如吳  
越人田而耕之則利十倍於葦即捐其一以與勢族  
使不失其舊入勢家亦無憾焉昔虞文靖公之議東

極遼海南濱青徐瀕海皆可田之地今豐潤實其中  
境欲舉其議而行之滋非其先當致力者乎蓋先之  
京東數處以兆其端而京東之地皆可漸而行也先  
之京東以兆其端而畿內列郡皆可漸而行也先之  
畿內列郡而西北之地皆可漸而行也在邊陲則先  
之薊鎮而諸鎮皆可漸而行也至於瀕海則先之豐  
潤而遼海以東青徐以南皆可漸而行也夫事有小  
用則宜大則局而不通大用則宜小則窘而難布茲

其試之一井究之天下無不利者事有旦夕計功而遠敵不存積久考成而近效難覩茲其暫之歲收久之永賴無不利者特端之於京東數處因而推之西北一歲開其始十年究其成而萬世席其利矣客曰西北之人歲苦水害奈何利之且彼宿苦其害而子驟言其利其不信亦何異乎曰嗟乎水在天壤間本以利人非以害之也惟不利斯為害矣人實貽之而咎水可乎蓋聚之則害而散之則利棄之則害而用

之則利如血之在人身流貫於肢節而潤澤其肌膚  
一有壅注則上而為癰下而為痔又或溢出於口鼻  
而因以戕其軀遂曰血之為人害也亦舛矣今之咎  
水害者即山川之委原未悉胡不引人身觀之也古  
昔盛時列國分布畫井而田畛達於溝溝達於洫洫  
達於澮澮達於川縱橫因其地勢以取利於水今西  
北皆其故疆也豈古以為利今以為害乎且東南之  
民爭涓流於尺寸之間何者彼固利之也謂水利於

南而獨為北害此必無之理也客曰南北均利水矣而北之視南亦有難易乎徐子曰北易客廼咤曰子固好奇甚言北之利於水耳烏得而稱北易也曰客何異予言哉南方之民披簑而耕抱濕而獲蓋恒與雨相值也長夏苗將立稿則訟風伯而祝雨師盼盼焉以一沾濡為快廼西北之雨多於長夏而耕獲之時少雨其易於南天時則然也西北地曠而水夷稍一疏引水即為利東南之地高下相懸有轉水於數

仞之深者再日不雨則桔槔之聲徹於郊原竭人力以資灌溉苦且難地勢使然也考之古昔厠深尺許遂深二尺溝深四尺洫深八尺澮深二仞而已未有如東南轉水於數仞之深者至於京東山之湧泉溢地而出河之支派等地而平其於西北尤為易易也東南瀕海歲多潮患蓋海之勢趨於東南也遼海以及青徐有海之饒而鮮潮之患其難易又彰彰矣奈何目為萑葦之場而棄之不田乎予謂北易蓋亦有



據而言之也客曰南北水利修廢頓殊亦有由乎曰  
水利修廢由於人之聚散而旋轉之機上實握之西  
北在三代盛時溝洫時修農功畢舉厥後魏史起引  
漳水溉鄴以富秦開鄭國渠溉烏鹵之地四萬餘頃  
關中為沃野秦以富強至漢文翁溉灌繁田千七百  
頃而蜀饒白公穿渠引涇水溉田四千五百餘頃而  
民以饒富馬援引洮水種杭稻而狄道並塞之民得  
以樂業虞詡復三郡激河浚渠為屯田而省內郡之

費蓋三代之時溝洫遍於列國水之為利也宏魏秦各擅其利文翁以下諸子人興其利水之為利也專然皆在西北之境若東南稱水利者在漢以前惟馬臻開鑑湖而已他未有聞也及西晉之亂中原生齒漸耗從晉室而東徙者謂之僑人久則安其土而樂其生西北民散而東南利興非細故也即如東南之饒三吳稱最在禹貢揚州之域厥土塗泥厥田下下而已漢之時亦一澤國耳惟晉室既東民日聚而利

漸興然其財賦亦未至於今日之盛也至五代時錢  
鏐竊據以稱饒及南宋偏安以致富則民益聚利益  
興而財賦遂甲於天下矣嘗考宋紹興五年屯田郎  
中樊賓言荆湖江南與兩浙膏腴之田彌亘數千里  
無人可耕則地有遺利中原士民扶携南渡幾千萬  
人則人有餘力若使流寓失業之人盡墾荒閒不耕  
之田則地無遺利人無遺力以資中興由此觀之則  
宋室方南之時東南尚有曠棄之田及其季年人多

而田少豪右擅陂湖以自殖地利盡而民不聊生者聚故也東南地利盡而西北曠廢厥有由哉今國家當全盛之時兵戈不試者二百餘年南北生齒日漸繁夥而東南之民爭附於輦轂之下誠勞來安集於其間則民聚而利無不興矣即畫井而溝洫之亦不難也矧秦漢以下其興利而足民者獨不能尋其迹師其意而行之乎何至待哺於江南也彼其竊據稱饒偏安致富者亦不得已耳廼今國家奚賴焉其機

固在一旋轉間也客曰西北利水吾固知其舊矣然  
吾聞懷慶紀守嘗因丹沁支流疏渠成田民頗利之  
紀去而田隨廢又如真定楊中丞之家居也亦嘗募  
南人緣水墾田歲入甚饒及滹沱旁決桑田之變抵  
瞬息間耳豈久廢之餘固難卒舉者乎是所謂廢食  
於噎非通論也夫利水之法高則開渠卑則築圍急  
則激散緩則疏引其最下者遂以為受水之區因其  
勢不可強也然其致力當先於水之源源深則流微

而易禦田漸成則水漸殺水無汎溢之虞田無衝激之患彼懷慶當丹心之下流而真定尤滹沱所必衝者也安能久而無患哉蓋不先於其源之故也嘗考桑乾水發於渾源州經保安之境則自懷來夾山而下至盧溝橋狼窩地方衝溢為患漫至彰義門先朝屢經修築為費不貲今保安境上聞有用土牛逼水成田者恐亦不能久而無患也若督責有人多方招募使桑乾上流皆引水成田則豈惟保安之田恃以

無患而懷來以下水患亦殺矣予又嘗物色瀛海之  
間如元城窪羅家灣窪郝家庄窪高橋鋪窪章家橋  
窪皆連阡黑壤廢為水區非不可田顧以下流受黑  
洋等九河之水非先致力於水源未可徼利旦夕而  
終貽水患也客曰子論甚悉然世之疑而不遽行者  
亦有說焉一難于得人二憚於費財三畏於勞民四  
忌於任怨五狃於變習子亦不可不察也曰微子言  
予亦籌之夫畏事者既因循而不理喜事者又輕率

而罔功固矣得人之難也是必有經畧之功而無紛  
更之擾使利興而民不知則善矣世固有能任之者  
亦不如宋人專以勸農之名亦不如今制責以水利  
之職蓋勸農而興水利牧養斯民之首務也今若另  
設勸農而水利又有專職則若於牧養斯民之外增  
勸農水利一事被之號為牧養斯民者又將何為耶  
今之開府持節與藩臬守令皆以牧養斯民也勸農  
水利責將誰諉惟於開府持節者得人以擇藩臬以



擇守令久任而責成之殿最繫焉利興而民不知者  
可坐而致也世之言費者吾惑焉夫捐數萬金之費  
於春而收數萬石之獲於秋費於帑而償于田此庸  
人操十一之利者尚甘心焉曾謂善於謀國者而顧  
以費為憚乎且始為而獲繼是有興即以所獲者為  
資漸而廣焉不煩再費也畏於勞民雖文忠公嘗有  
是論文忠公之言曰天下久平民物滋息四方遺利  
皆畧盡矣今欲鑿空尋訪水利所謂即鹿無虞豈惟

徒勞必大煩擾所在追集老少相視可否吏卒所過  
雞犬一空審如文忠之言民信勞矣子謂不必於牧  
養斯民之外而專設勸農水利者亦恐其喜事勞民  
如文忠公之言也誠得牧養斯民者擇其勢順而功  
省之處暫出官帑募願就之民經畧其端以示倡率  
之機使民灼然知水利可興則必有競勸而爭先者  
庶令不煩而事自集若槩以水利役民使貧民苦於  
追呼妨其生業而富家反擅其利予嘗見水利使者

檄下諸邑閱治水利輒飽吏胥之橐而害及閭左此文忠公所以極論而深嘆也怨生有二妨小民之業怨隱而害深奪豪右之利怨顯而謗速既不槩以水利役民民無追呼之擾怨不叢於小民矣而豪右之利亦國家之利也何必奪之周禮使世祿地主之力者與其廣瀦鉅野之可以利民者曰主以利得民曰數以富得民彼小民欲自利而力有所不逮官為倡率豪右從而競勸於其間則借豪右之利以廣小

民之利固主與數之遺意也方欲籍之矧曰奪乎此  
何以任怨為也北之治田也逸南之治田也勞彼其  
以惰心而乘之以逸習卒而驅之宜有未從者然彼  
之鹵莽而耕亦鹵莽而獲所入固微也以南之勞治  
北之田則一畝之入倍於數畝而旱潦可以無憂試  
一驅之其嗜利之心必潛易其好逸之習且相率而  
為逸者以其習之故然比閭族黨皆然也官為倡率  
有能爭先力田者稍優異之則皆恥於逸而趨於勞

矣昔張全義起於羣盜其尹河南也當喪亂之後白骨蔽地荆棘彌望居民不滿百戶全義擇人以修屯政招徠農戶流民漸歸遠近趨之如市全義為政寬簡出見田疇美者輒下馬與僚佐共觀之召主勞以酒食有蠶麥善收者或親至其家悉呼出老幼賜以茶絲衣物民間言張公不喜聲伎見之未嘗笑獨見佳麥良蠶則笑耳有田荒蕪者則集衆杖之或訴以乏人牛則召鄰里責之曰彼乏人牛何不助之由是

鄰里相助比戶有積蓄在洛四十年遂成富庶蓋其  
勸農力本生聚教誨變荒墟為富壤非偶然也誠使  
西北牧養斯民者能以全義之心為心未有狃於故  
習而不變者不一日倡率而遂曰習之難變可乎夫  
得人而任捐公帑以募就役之民宜怨讟不生惰習  
可變而田功畢舉矣迺若不費公帑不煩募民而田  
功自舉者予又得而熟籌焉邊地屯田以餉軍也其  
道有三倡力耕之機定賞功之典廣世職之法而已

內地墾田以阜民也其道有三優復業之人立力田之科開贖罪之條而已蓋大將固偏裨卒伍所望而趨也今諸邊沃土多大將養廉之地使大將肯以其地畫井而田以率偏裨卒伍無不響應而競耕者昔郭子儀因河中軍乏食廼自耕一畝將校以是為差於是士卒皆不勸而耕是歲河中野無曠土軍有餘糧昔宋廖給事中剛亦嘗首陳是說也將卒捐生而赴敵者冀以功而獲賞也今若計田行賞又如廖給

事所謂勞來之安定之操戈之危豈不特易此賞一行萬頃不難得者信然矣今富民得納貨以列武弁職冗而軍政無裨也若倣虞文靖公之意聽富民欲得官者能以萬夫耕則為萬夫之長千夫百夫亦如之先試以虛銜緩其征科俟其田入既饒積蓄漸充則命以官而量征其稅就所征者得給以祿佩之印綬得世其官練集其耕夫以寓兵於其間真良法也民之流離棄其業而畏不敢復蓋瘡痍未起科督又



嚴甚則舉其宿負者而取盈焉此宜上有以招徠之  
蠲其負寬其征時其賑貸則離流競復荒蕪漸墾矣  
漢之盛時孝悌力田同科蓋務本重農以寓勸率之  
微權也今若定為之制有能於荒蕪之鄉墾田而井  
者田得自業而輸其稅於官官因稅而定等上者如  
納粟待銓次者遥授散職又其次者補胥吏而役於  
官則力田者競起矣贖罪有條借貪墨以行私者何  
限也使令罪而有力者捐貲墾田官課其墾田之費

與贖罪相當則歸其田而收其稅即無力宜遠配者亦得近屬於田畝之間以力墾田而贖其罪此固法行而人亦樂從也倘舉數者而行之屯田可興墾田可多又何必費出公帑而役煩募民哉客曰就子數說尚有可宜者捐生而獲邊賞積汗馬之勲而獲世職欲以田畝之勞並可乎力田贖罪田固彼之田也稅入幾何恐無以足經費而佐司農之急談何容易子更籌之曰審時度勢各有攸當也敵刃既接軍功

為先邊烽稍寧屯政是急倘屯政舉而邊地墾食足  
兵強敵來而應之有勝算敵去而守之有長策又何  
軍功之足羨乎若徒尚軍功則忽內修而啓外釁非  
國家之福也且邊人之剽悍者勇於赴敵其推魯者  
樂於力田各以其長邀上之賞又何妨焉今邊地久  
蕪師不宿飽非懸殊格亦何望屯政之修乎即兵興  
之時轉餉勤勞亦得與對壘者論功客何疑之至於  
世職之法所繫于今日之邊務者尤非小也今之武

弁能因世閥以樹功名者固亦有之然其間困乏孱弱僅存者種種矣惟其先世汗馬之勞不忍遽廢則可耳欲藉以練卒而應敵必不能也彼富民欲得官者能以萬夫耕則其財力智識已出於萬人之上能以千百人耕者亦出於千百人之上其財力智識既足以為主帥之倚用使之部耕夫以為勝卒又皆其衣食安養者心附而力倍其與今之武弁困乏孱弱剝羸卒以自肥固天壤懸也子源席其世業亦不至

於遽替即有替者又必有財力智識之人代其業而繼其官邊圉之間轉弱為強茲其大端矣瀕海之地國初皆設墩臺分戍瞭守以備南倭今草頭沽關及水道沽關以至於新橋海口赤洋海口等處遺址尚存日漸圯廢國初設墩分戍固將備倭亦以南北勢懸使瀕海墩戍連絡於其間則內地有梗北路可通又防微慮遠之深意也惟其初設墩戍稀少冀後漸增然無田可耕則墩戍漸廢勢必至也今若於瀕

海關田以世職之法屯駐於其間久之田益闢而人益聚則海上為樂土瀕海有通道即內地有梗南北不至懸隔於國初設墩分戍之意固相成也國家分兵而屯授之以田統於衛所之官法非不詳然久則田隱占而屯亦漸廢蓋田授於官兵非已業也惟富民得官屯駐則其田固已業子孫相承稽覈自詳無隱占之患蓋井田而寓封建之意也夫富民捐己之貨闢荒區以輸稅養耕夫以寓兵其利於國者多矣

就其所入給以祿朝廷御之以虛名使之世其職而  
守其業有增課之饒無養兵之費又何靳而不與乎  
彼積汗馬之勲者祿入兵費皆仰給於縣官歲糜而  
無補安可以此例論也今民間子弟入胄監者例得  
輸三百五十金若使力田者於荒蕪之野墾田三百  
五十畝得比輸三百五十金者而同科則國家一時  
雖未得三百五十金之入而歲收三百五十畝之稅  
歲歲積之其得更倍諺謂千鋸而家藏不若銖兩而

時入此尤易曉也田少而殺與贖罪而入者即是可推也若恐力田可同於輸金則必有偽增田畝以欺上或始而墾旋而廢難以一一稽之則又不然夫民間始繫名於胄監距其入銓得官之時多者三十年少亦不下二十年所墾之田入官稅總而計之當不止於三百五十金彼既墾田歲以其田之入而輸官不難也亦何樂於偽田增稅歲以厲己乎即有田偽而稅負者有司將時稽而除其名彼亦何利焉若謂



國用方詘經費之內歲少三之一必賴開納以紓其  
急不能徐徐以待歲稅之入則亦思之未詳也蓋經  
費之廣由於各邊主客兵餉所費為多若各邊屯政  
漸舉則經費自省況力田者得以田自利而歲稅又  
取足於田之所入其從之固易則以力田而應者比  
令輸金之人必且數倍其願輸金者仍輸金不因此  
而廢彼二者並行國用又何患焉行之積久田闢而  
稅廣費省而用足則力田之科與輸金者皆可漸罷

又不必商盈詘於財賄酌多寡於開納也客曰勝國  
都燕且百年虞文靖公之議格焉未行我國家定鼎  
於茲又二百年矣通漕理財紛然建議而西北水利  
未聞舉其議而行者子何惓惓於今日也曰勝國往  
事已無足論虞文靖公之言既不獲售於泰定可為  
之時及季年東南有梗思其言倣其意設海口萬戶  
已無救於元事矣可勝慨哉國家承平既久竭東南  
之力尚不足以裕西北之儲幸外國之款貢修內地

之水利千載一時不可失也若急而圖之其將及乎  
此予之所以惓惓也京北水利興則敵騎不能馳驅  
敵必不敢復窺燕薊而兵不必調食可自足秦晉中  
州水利興則會流黃河諸水皆有渚蓄而河無溢流  
漕渠自利江以北水利俱興則北地所出可足京師  
之用而南糧可省即宗祿亦自可取給世以北敵漕  
河宗藩為三大患吾只以興水利一事並治之能使  
不為患今之籌國者孰不以財用之不給為憂又孰

不以漕渠之不可恃為慮然而西北之境沃衍十里  
昔人所以坐致富强者其成跡具在若虞文靖丘文  
莊之論亦既詳且確矣而卒莫有肯任其事見之施  
行者何也豈非以積敝之餘驟振為難利未及興而  
或以滋害歟茲固老成謀國者之所宜慎也然審如  
徐子所云先之京東以次推廣責之守令不設專官  
多方勸募不煩公帑不强民之所不欲不奪豪右已  
成之產不為官司收種之擾若是則所謂法行以漸

而不驟有萬全之利而一無其害者復何疑焉蓋是書也集古今之議而酌其宜析利弊之源而殫其盡視虞丘二公之論益詳且確矣籌國者果采而行之即使萑葦之場盡為庾廩殆非虛語也財用之不給漕渠之不可恃又豈足憂乎

論治水莫先於京東

當今經國訏謨其大且急孰有過於西北水利者乎雖然驟而行之則效遠而難臻驟而行之則事駭而

未信蓋西北皆可行也蓋先之於畿輔諸郡皆可行也蓋先之於京東永平之地皆可行也蓋先之於近山瀕海之地近山瀕海之地皆可行也蓋先之數井以示可行之端則效近而易臻事狎而人信又恐其難於遙度也則又裹糧為二三解事者走沿瀕海近山之境相度而經畧之既得其水土之宜疆理之詳始信其事之必可行也

宋朝屯田水利

東自滄洲界去海西岸黑龍港口如乾寧軍信安軍  
霸州保定雄州順安壹帶皆有塘水陰灌稻田塘水  
之北畫河為界所以限南北謹障塞也初淳化中雄  
州何承矩制置緣邊屯田以大理丞黃懋克判官懋  
於河北大興作水田緣山導泉倍省工力以陂塘甚  
多引水溉田公私獲利因詔承矩領護之發戍兵萬  
八千人給其役承矩於順安軍西開易河蒲口引水  
東注至海東西三百餘里南北五十七里滋其陂澤

築堤貯水為屯田以助要害捍蕃騎侵軼時多為將  
帥所沮云甲馬雄盛不宜示弱殊不知地利者兵之  
助也又順安至西山地跨數軍不遙百里縱有丘陵  
岡阜而多泉瀆因而廣之審地勢而制塘堦令滄州  
乾寧軍常督壕寨吏轉視斗門水口旦夕俟海潮至  
放水入御河東置塘以益塘水由是順安軍東瀕於  
海廣袤數百里悉為稻田荻蒲蚌蛤民賴其利太宗  
以為渠田之設制戎馬之長策又以安撫司專制置



緣邊浚陂塘築堤道具為條式畫圖以付邊郡屯田  
司東自泥姑海口凡一百六十里西盡邊吳泊凡歷  
七州軍近復據樞密使夏竦上言沿邊塘泊自海而  
西至邊吳淀及安肅軍保州而西接西山路濶一百  
餘里其間有紀河曹河徐河叫喉泉尚泉方順河安  
陽河唐河盡可堰截引水灌注以為塘淀遂詔修保  
州廣信安肅順安永寧五州築堤道作匯水之備惟  
跳山以西有壅水不可到處第密種所宜樹木

祥符中沿

邊官地榆

柳三百萬

宋朝所論形勝

論曰今北邊控扼之方中國形勝之地西自黑蘆口  
東距滄海其間三百餘里中國得地者多匈奴得地  
者寡何哉且自順安軍東至莫州二十里皆是川塹  
溝瀆葭葦蔽弗泉水縱橫此乃匈奴天牢之地也彼  
自不能馳騁又東北至雄州三十里又東至霸州七  
十里又東至海水口皆是營田堤岸泉水漸如此乃

匈奴天陷之地也彼自不能騎射又自順安軍西至  
安肅軍約五十里夾兩河之間草木茂盛乃匈奴天  
羅之地也彼自不能騎戰又西至廣武軍二十里夾  
貳軍之間地多磽确此匈奴天隆之地也彼自不能  
奔衝此中國得地形之多也夫引弓之民恃其勁騎  
利在平地中國多步兵利於險阻趙魏之北燕薊之  
南十里之間地平如砥兵法謂走不逐飛步不逐騎  
較然可知矣今北邊要害阻塘水之外自保州邊吳

泊西距長城口廣袤五十里可以長驅深入乃中國  
與匈奴必爭之地

開西北水田紓東南漕運

善醫者治未病不治已病蓋未病而治之則元氣固  
百邪不能為之侵矣苟不得已而治已病焉邪氣已  
深非急攻之不能起死回生故凡烏附砒霜惟其所  
用雖病者亦急於求痊聽其所用而莫之禁也急則  
治標緩則治本理固然也及病勢稍愈雖參苓歸朮

之投且慎之至再若見效稍遲議者羣起而非之不  
特醫以目前愈病為功索謝為念而病者亦忘其危  
迫之苦不求完養元氣以免將來之患矣曾謂善醫  
與善攝生者顧如是乎急則妄以身命付之庸醫緩  
則道謀巷議泄泄然莫為後慮者滔滔皆是也今  
之醫國手何以異此是故我朝定鼎燕京百費皆仰  
給東南而漕河為最要也是漕河為國家咽喉漕河  
病則咽喉塞矣可不懼哉蓋漕河之水黃河據其上

流黃水一不循其故道則徐沛諸水泛濫相繼頻年  
河病亦亟矣當事者百計撐持不過捲帙撈沙築堰  
建閘濬海口挑月河大槩僅以不失運為上策通者  
謂海無可濬之理惟當導河以歸之海則以水治水  
即所以為濬海也然河豈可以人力導之哉欲順其  
性先懼其溢惟當繕治堤防俾無旁決則水由地中  
沙隨水刷即導河之策也于是築河堤以束上流造  
減水閘壩泄水涵洞以導下流塞崔鎮之決使全河

不分塞高堰黃浦八淺使全淮堵截且修通濟清江  
福興各閘復禮智各壩今幸諸決盡塞兩河復合而  
漕無轉輓之艱其實所費不貲特免目前之急耳雖  
急則治標重病稍愈而善醫國者恐不止如是而已  
蓋元氣不固難保舊病不復作也緩則治本豈容泄  
泄然哉以愚度之西北曠地不於此時墾而闢之以  
為固本之圖則東西漕運更有難為力者即如畿輔  
郡縣一望千里崔葦極目瀛深諸郊一遇淫潦溟渤

為區而濱河瀕海之地本皆古人稼穡之場也使得  
賢守令悉心講畫用南人水耕法募人田之開墾既  
多收入必富由是西北各郡邑粟多而價賤則民富  
國不獨貧東南之困不可以少紓耶若曰召募游兵  
墾田立室與夫牛種之需皆無所助獨不思每歲治  
河之費何啻百十萬金與其付諸波浪中止為目前  
之計曷若用以開其溝洫畝澮而獲歲歲無窮之利  
哉苟釋此不為無異病急則請禱神百費不惜病愈



則肉食是吝而或有告之治未病者反從而嗤笑之矣抱杞人之憂者何能以自解耶噫古人窮則願為良醫達則願為良相同此心也同此道也安得盡國人語之以固本養元之道而勿藥有喜哉

### 古今水利總論

論古今水利之制莫善于周莫不善於漢夫水利之在天下猶人之血氣然一息之不通則四體非復為有大而江河川澤微而溝洫猷澮其小大雖不同而

其疏通導達不可使一國之壅害則一也成周之盡力於溝洫西漢之用功於河渠不貪小利以害大謀不急近功以遺遠害田畝有灌溉之益川澤無壅塞之憂此周禮通溝洫遷史書河渠之利歟且成周匠人之職方井之地廣四尺者謂之溝十里之成廣八尺者謂之洫百里之同廣二尋者謂之澮夫自四尺之溝積而至於二尋之澮一同之間其捐膏腴之地以為溝洫之制者凡幾畝也

禮冬官匠人為溝九夫為井井間廣四尺深四

尺謂之溝方十里為成成間廣八尺深八尺謂之洫方百里為同同間廣二尋深二仞謂之澮小司

徒之經土地而井牧其田野說者論田稅之所出則百井之地出田稅者六十有四而三十六井則治洫也萬井之地出田稅者四千九十有六井而五千有奇則治溝與澮也夫自一成之地積而至於一同萬夫之衆其捐賦稅之入以治溝洫畝澮之利者幾人也地官小司徒注成周之君豈不愛膏腴之地賦歛之入而棄以為無用之溝洫哉誠以所棄者小而所利者大

所捐於公上者不能毫髮而所以福斯民而澤天下者無窮已也自經界不明而先王溝洫之制漫無可

考以九河之地猶失其八支而莫得其迹

東坡辨九河云以漢

許商之言考之徒駭最北鬲津最南蓋徒駭是河之本道東出分為八齊小白塞之今河間弓高以東至平原鬲津之地往往有其遺處蓋其八支併歸徒駭也

則細而溝洫之屬可知

矣天下所謂有才之士始出而以私智經營雖其利澤不博未及古人徧利天下之意不猶愈於後世與水爭地貪尺寸之利而遺無窮之之害哉自春秋戰

國浚其源西漢導其流而河渠之水利詳矣孫叔敖起

兮陂楚受其惠文翁穿洩口蜀以富饒

史記

鑿漳水於

魏者鄴旁有稻梁之詠

魏襄王時史起為鄴令曰魏氏行田以百畝鄴獨二百畝

是田惠也漳水在其旁西門豹不用是不智也於是引漳水灌田鄴以富民歌之曰鄴有賢令兮為史公決漳水兮灌鄴旁終

古寫鹵兮生稻梁

導涇水於秦者涇陽有禾黍之

謠

班固西都賦又前溝洫志自秦用鄭國穿涇陽渠又名鄭國渠至武帝中大夫白公復奏穿引涇水

首起谷口以灌池陽因名曰白渠民歌之曰鄭國在前白公在後云云且灌且溉長我禾黍

此建

於春秋戰國之時自漢以來講明尤備內而京師外

而列郡又遠而邊地源流派分原隰碁布歷歷可見

矣嚴熊穿龍首渠於馮翊之地

注見前

倪寬穿六輔渠

於左內史之治

武帝元鼎間倪寬為左內史奏請穿六輔渠

白公引涇水

於池陽之區

見上

決渠降雨荷插成雲衣食京師億萬

之口豈非京師之利乎

西都賦

其他郡縣泰山則引汶

東海則引鉅定海南九江則引淮朔方西河酒泉諸

郡則皆引河及川谷以溉田

溝洫之用事者單言水利朔方西河河西酒泉

皆引河及山谷以溉田而關中輔渠靈軹引諸水汝南九江引淮東海引鉅定泰山下引汶水皆穿

渠溉田各萬餘頃他小渠及陂山通道者不可勝言也

陂山通道在在相望豈

非諸郡之利乎輪臺之東有渠溉田五千頃

桑弘羊奏故輪

臺以東枝渠黎皆欲國地廣饒水草有溉田五十頃以上溫和田益可益通溝渠而種五穀

而鮮

水左右亦有橋七十所

趙充國屯田奏云願留萬二千人屯要害處繕鄉亭浚溝

渠治隍隄以西道橋七十所令可至鮮水

是雖極邊之地水道源流無不

加意又豈非邊地之利乎西漢之君不計地利之廣

狹不論費役之多寡不一勞者不永逸不暫費者不

永寧此漢人得享溉灌之利也然周漢所以得水利

者治之者非一官領之者非一人得以盡心於溝洫  
河渠之間是故周官營溝行水之制則職之匠人俾  
任浚導之功也匠人為溝洫凡溝必因水勢防必因  
地勢止水蓄水之令則領之稻人俾專儲蓄之利也  
地官稻人以潴蓄水以防止水以溝  
潴水以遂均水以列舍水以漕澇水  
夫惟浚之於其  
始積之於其中又安有旱澇之患哉漢之京師則少

府摠禁池之事其屬則有池監

百官表少府掌山海  
陂澤之稅其屬有上

林上池監有  
都水長丞

有都水

見上

水衡掌林苑之事其屬則有



水司空

百官表水衡都尉水司空長丞屬焉

有都水

前百官表奉常注如淳曰都水治渠

隄水門又按大常少府水衡署有都水長丞

三輔以行京師之職太常以

領巴陵之渠

並百官表

郡國則九江有陂湖官南海則有

淮浦官南郡江夏則有雲夢官夫惟既任於其內又

分於其外又安有壅閼之憂哉

地理志九江郡有陂湖官南海郡中有

淮浦官南郡江夏郡有雲夢官

宋朝惠養元元留心水利三司則有

都水監

宋朝官制都水監屬三司員無常職興役則差

諸路則有提舉

淳熙七年

臣僚乞委提舉常平糴陂塘於海門諸水為備

州有倅貳邑有丞佐

淳熙七年又臣

僚劄子乞委諸路常平司籍定所隸郡縣公私陂塘  
川澤之數專責縣丞因民暇日勸率疏導聖旨依令  
專責縣丞於農隙日  
浚治疏導廣行儲蓄而  
又郡有守邑有令皆得以行

其浚導儲蓄之利故修蕭何之故堰則若許景山而

廢壞之地復蒙大利

真宗朝知興元府許景山常修漢蕭何所為故堰號其屬曰鄮

侯方定天下乃暇為此以灌農田今吾豈憚一時之勞而費萬世之利於是因其壞堰大修之正鄭

公在前白公在後之意也

見上

修召信臣之舊渠則若

趙尚寬而荒廢之場變為沃壤

仁宗朝有唐州太守趙尚寬者復修召信

臣渠與境內陂堰向為荒瘠之地變為沃壤三司使包拯上其事以嘉其能命留再任且有擢旌之諭

正前有召父後有杜母之意也

後漢杜詩復修召信臣南陽渠人歌之曰

前有召父後有杜母

築海堤以衛田而民享其利則如范文正

范仲淹監西溪稅建白於朝請築海堤於通泰海州之境長數百里以衛民田以文正為興化令專掌役

事發通泰楚海四州民夫治之既而民享其利興化以范為姓興水利有功而治累

得聲則如劉彝

安定胡先生有治事齋如治兵水利之類常言劉彝善治水後累為政皆

興水利得人如是則其利可勝計耶今日聞有論水利

之事矣而不蒙其利聞有任水利之官矣而不行其

勞太湖數陂澤水之所潴而河渠畝遂水之所泄豪

民墾之以獲豐殖之資官私仰之以享租輸之入及其日增歲衍而水利之故地皆為創置之良田曩之仰其水利以耕者今不勝旱溢之害是故不可以悉舉也姑以越之鑑湖言之自漢永和中始闢其廣二百餘里而灌溉之利及於民者為田八千餘頃及熙寧中盜耕其中者九百頃至近歲又甚矣至取其田以歸之公上此未害也而不知所剩者僅數百畝而利之所以復未必盡歸之官所言者凡數十頃而駸

駁不已則越三郡將受其弊矣倘今日公上不利絲毫之賦守令不恤豪右之民毋惑於紛紛之議毋付於悠悠之事則何患乎利不具害不除而使周漢專其利哉雖然有利固當舉也亦未易輕舉也才不辨者不足任心不盡者不足任苟且順從者不足任上糜帑庫下奪農田隄防一開水失故道間有指鄰國以為壑說禹貢而行河者益以滋其謬耳不然聞之苕溪入太湖東坡何託此以諷熙寧興水利者哉

漕運各總船數

南京衛分淺船原共一千七百四十隻今增至二千一百三十隻每年該造船二百一十三隻

江北直隸各衛所淺船原共二千六百九十六隻增減不同今共船二千五百四十二隻每年該造船二百五十四隻二分

中都留守司淺船共八百八十七隻每年該造船八十八隻七分

山東都司淺船共七百七十六隻五分每年該造船  
七十七隻六分

遮洋總海船原共五百一十二隻一分今增至五百

四十八隻一分每年該造船五十四隻八分

以上淺  
船海船

原造於衛河提舉司  
今併入清河廠團造

### 附錄

浙江都司淺船共二千四十六隻

江西都司淺船共八百九十九隻

湖廣都司淺船共七百五十九隻

江南直隸淺船共一千二百五十八隻

以上造於各原衛所

運船料額

國初漕船派造於諸省及各提舉司其料價例為軍  
三民七天順六年以後諸省罷造止解料赴二司廠  
江南漕船歸造原衛者照例派料故軍無補貸天順  
間料價倚辦於各省者徵解如期照數給造故軍所  
補尚未多也成化元年以後各處災傷料價日縮軍



士始有賠補之患矣成化十五年停止各處派料議  
取抽分水價以充造船之需成化十六年取荊杭木  
價銀各四千兩成化十七年取荊州木價銀四十兩  
杭州木價銀五千五百兩成化十八年議取荊州木  
價銀六千兩杭州木價銀七十兩成化二十年荊杭  
銀數如故取蕪湖木價銀一千五百兩成化二十二  
年蕪湖木價銀九千五百兩荊州木價銀七千三百  
兩弘治二年議增取杭州木價銀一萬八百七十兩

荊州木價銀八千三百兩蕪湖銀數如故弘治三年  
會議每船一隻艘官給木價銀五十兩軍辦銀五十  
兩舊船准銀五十兩通計銀一百二十兩弘治四年  
以後銀有定數船日加多官軍每有借貸之患矣弘  
治十四年會議每船一艘增木價銀五兩及移荊州  
木價悉於蕪湖取用弘治十六年會議每船一艘增  
木價銀十兩軍辦小料銀三十五兩嘉靖三年議將  
南河提舉司原額蕪杭木價及人匠班銀悉歸清江

厥以供造船之需

古今漕船總畧

論曰三代而上漕法未備無論已

古者封建井田各有定制天子食於

國中禹貢所稱四百里粟五百里米是已其卿大夫各有采地而兵賦寓於農無後世養官養兵之費也

春秋秦輸粟於晉自雍及絳相繼命之曰汎舟之役

漕運之舟始此

秦欲攻匈奴使瑯琊負海之郡轉輸北河

海運

之舟始此

漢用張良議河南以東造船五百艘歲漕東方

之粟於關中

歲不過數十萬石武帝時用粟多歲漕至四百萬石

耿壽昌糴關

內之粟築倉理船費至百萬有餘

當時船數之多可知蕭望之議其事

不便帝卒用耿議漕事果便

唐劉晏領漕事乃於揚子置十場造

船每艘計錢千緡

或言虛費太多晏曰不然論大計者不計小費凡事必為可久之慮

云

即鹽利顧傭分吏督之隨江汴河渭所宜造歇艍

支江船上千艘受粟千斛

唐漕法江船不入汴汴船不入河河船不入渭江南

之運積揚州汴河之運積河陰河船之運積渭口渭船之運入大倉歲轉粟百一十萬石無升斗溺者

宋初命溫台婺楚諸州設場歲造運舟分綱而運

共三

千三百餘艘處州六百五吉州五百二十五明州一百七十七婺州一百三十溫州一百二十五台州一

百二十六楚州八十七潭州二百八十鼎州二百四十一鳳翔斜谷六百嘉州四十五天禧末議於各州歲減造四

皇祐中漕綱法壞用發運使許元議諸路

增置漕船然勞費甚鉅久之寢弊也

宋漕法分為四路江南淮南浙

東西荆河南北六路之粟自淮入汴陝西之粟自三門白波轉黃河入汴陳蔡之粟自閔河蔡河入汴京東之粟自十五丈河歷陳濟及郡皆至京師初於各州置倉行轉搬法歲漕粟七百萬石一變直達久涉歲月奸弊互生所積發運名浮於實漕政日壞至是用元議增舟輪米充歲計如故事既而諸路綱亦不集汴綱既不得至江江船亦不至京師船愈壞而漕愈減耗矣至我朝洪武元年詔

中書省議漕粟於京師三十年議海運遼東以給軍

餉此漕政伊始也

是時河海運船俱改造川湖諸省及龍江提舉司以諸省產未近水

州縣軍民相兼成造亦有造於龍江關者

永樂初議於淮安臨清建清江

衛河二廠令各衛屬督造運船六年令遮洋海船運

糧八十萬石於京師

會通河衛河以淺船轉送

嗣後罷海運遮洋

船外增設淺船

共三十餘艘南京直隸江西湖廣浙江各總裏河淺船俱造於清江遮洋

海船并山東北直隸三總淺船俱造於衛河大約造於清江者多衛河十之七淺船從儀真徐淮臨得運

至通州遮洋海船由山東北直隸從直沽入海轉白沙河運至薊州先年遮洋船多直隸清江廠造尋改

衛河十三年開清江浦裏河運船徑達清口南北始通

宋雍熙中轉運使劉璠議開沙河以避淮水之險喬維岳繼之開河自淮安至清口凡六十里舟行便之是歲平江伯陳公瑄訪詢故老尋喬維岳故道建漕四閘以通漕自是舟無車壩之危淮波之險矣

政殊大備焉宣德間議造淺船或歸原衛或隸清江

南京鎮江江北直隸諸衛隸於清江其江西湖廣浙江江南直隸各總以各諸水次兌軍不專在淮安常盈倉支運故歸原衛造船以便物料至後各船雖歸原衛計料修造仍從清江凡各船回至清江本廠委提舉司官匠估計應該修理或改造合用物料填註票帖給官軍回至原衛照數支給買料修造後因各船守候日久本司方行估計稽悞回程成正統間令造化十年以後議令各司府自行估計修理

船旗軍不與城守操練從總兵官武景泰間定匠役

班期

金清江衛河二提舉司匠役二年一班先年原撥蒯淮二府各色人匠共四十名二年一進每

年二千名在廠上工造船近因新編勘合該四年一

班班稀匠少造船不敷總兵官徐公恭奏照正統年

間例二年一班

天順間額天下船數

先洪武永樂間

戶部會議依擬

河海運船未有

定式亦無定數每年會議合用船隻臨時派造以為

增減至是定為一萬一千七百七十五艘合用官軍

十二萬一千五百

成化間木價告匱更置抽分

先景泰間

百餘員名領駕

分廠至是增設燕

其諸議改造大都因時注措

成化二

杭二處詳見奏議

議得衛河總遮洋海船山東北直隸淺船聽官軍領

價從便成造官軍仍如儀真自造雖有衛河主事管

轄緣隔遠不能遙制往往侵費以至船隻盜賣而潛

逃者成化二十三年御史謝文郎中洪漢奏將鎮江



衛淺船比照蘇松事例歸本處成造及將通泰弘治  
鹽城三所分撥軍民一體出辦料銀伍兩

間定立江南造船料價限期先是湖廣江西浙江南

民七出料打造各司府衛所不依時給領官旗員累  
都御史季公蕙總兵官郭公宏會題從之詳見奏議

正德間查處十總經燬補造船料從總兵官顧公仕

嘉靖初罷衛河船廠總隸清江正德十六年刑科給

靖三年該本部尚書趙公璜題准隆慶間漕司奏革

衛河廠衙門未幾裁革詳見奏議從都御史王公之

各廠武弁胥以文職理之請也詳見奏議 漕政益

畫一可循矣

舟車總題

兵車兵船  
見兵漕

舟車之利天下所必資也然船之用莫大於漕兵船之用莫大於防海兵車之用莫大於防邊前各以類附而造舟車則職掌於工曹故於此記其式與數焉

車制

按車之制方而任載曰軫曰箱四面皆廣六尺六寸大車深八尺兵車深四尺四寸小戎所謂伐收乘車皆然便坐立也軫之下木午貫而衡於車者橫曰軸

以受輪從曰輈以施行合於軸而外行者曰輪以軌  
之八尺記之除車之廣則輪厚七寸其輪之大兵車  
六尺六寸田車六尺三寸大速小遲也支輪者曰輻  
輻三寸外持輈內受軸者曰轂曰軹徑八尺中空有  
三四寸圓孔以受軸長一尺五寸出於軸外八寸兵  
車長三尺二寸故曰暢轂蓋古者行軍以車為營轂  
出輪二尺五寸使之比次齊整不相磨擊與離次也  
軸貫轂而出與轂齊端曰範範上之板曰陰所以約

轂使輪不外脫也轂軸之交運動易敗故各施金轂  
內之金曰輶軸頭金曰轄輶車從車後至前長丈  
四尺四寸亦曰轅輶之端高曲而施橫木以駕馬者  
曰衡又曰輶平直而施橫木以駕牛者曰輶又曰輶  
馬高牛卑也輶彎曲處有皮束之凡五故曰五檠梁  
輶駕於衡之兩馬曰服外兩馬曰騂皮繫於陰板而  
騂引於胸者曰勒亦謂之靳陰板有環以繫者曰續  
皮前繫於衡後繫於軫之兩端驅兩騂使不得內入

者曰脅驅馬之疆曰轡亦曰韉手執之而垂者曰草  
驂馬之內轡係於軾前謂之軻係軻之環謂之釭執  
兩服之四轡及兩驂之外轡而御之者曰六轡以皮  
為環總約六轡而游移不定者曰游環馬銜曰鑣鏤  
額有鈎當胸帶曰膺而在膺有樊纓樊馬大帶纓駛  
也鈴在鑣曰鑾在軾曰和或曰乘車之鑾在衡軫上  
橫木當陰曰軾却暑雨曰蓋亦曰轅空用朱鞞蔽旁  
曰輦第析竹所為並見齊詩載驅藏用不常故經傳

或有或無加木於車旁以防傾側曰輔詩無棄爾輔  
木止車將行則發之曰軻亦曰柅挽以上車之索曰  
綏尊者別有器如短梯者曰綦凡兵車曰軌軻取其  
屯衛朋屯又曰輶車取其輕疾如猶如巢其上而望  
敵者曰輶攻城曰臨衝輶輶婦人車及載衣物者曰  
輜輶蓋即施簾幕者以其漆而黑者故曰輜可以蔽  
屏故曰輶又曰輶輶取其如窗牖可開閉也器車及  
柅行載物者曰輶輶輶三者名殊義同四輪而卑取

其安而不傾覆也又有大車曰輦取其載之多小車曰輶人助輓者曰輦今之大車其輦之類小車其輶之類與此其大畧耳仰觀乾象若五車軫輻車府車肆甚詳故聖王經畧中原車制與經畧相表裏實制戎馬之精意而平居則以之辨等威學者則以之觀材藝其用為不小矣後世率從簡便平居則車肩輿名存實亡識者謂以人代畜而深非之至於車戰之法遂不可復一有戎騎充斥更不可制卒有虔劉邊

陞之禍今平國之人一議及此遂謂必不可復然則古先哲王豈故為此遲頓之器而費無益之財上天抑豈設此無用之象耶殊不知步騎今雖易辨而其敗莫能支車法始雖未易卒辦而其功則甚博今人徒計其始之難易而不要其終之利害譬之作室者北人多以甄土為壁每遇火災不過數十家止矣南人皆蘆竹為壁每延燒數十家及其重建則復如之徒取其始之易而不顧其後之害何以異此昔魏勝



造如意車用之輒效惜乎其法不傳方今歲有甲兵之禍盡召諸色人等有巧思者倣此意而斟酌之成造演習務欲脫駕輕易轉折便利縱送擊刺銃砲火器靡不如意行則為奇兵突擊止則為營在外庶可以遏奔突之勢亦制勝之一事也

### 論車制

夾漈鄭氏車說曰聖人作車圓而為輪方而為輿曲而為輶皆有制度運而無窮無作則止者輪也掬之

乎上拱之乎下者輿也載欲準行欲利以需為病以覆為戒者輈也輪以運輿以載輈以服三者備然後行故兵車乘車之輪各六尺有六寸田車之輪六尺有三寸轂以利轉輻以直指牙以固抱轂之材中以虛受軸大穿為賢小穿為輶外以實受軸故二分在外一分在內轂末則輶是也轂之約則篆是也軸之近轂則謂之股近牙則謂之骹骹入轂中謂之蓄骹入牙中謂之蚤夫牙之材或謂之渠其大足以包輻

故也或謂之揉揉木以為之故也轂又有革以輓之輻有綆以固之牙又有漆以飾之此輪之制也即輿以考之兩騎上出式者較也較下橫一木者式也軹則騎之植者以其旁止於此故曰軹軹則式之植者對人而言故曰軹輿後橫木則曰軹式前橫木則曰軌此輿之制也即輈以考之國馬之輈深四尺有七寸田馬之輈深四尺駕馬之輈深三尺適當伏兔圍在前持衡則為頸圍在後承軹則為踵圍此輈之制

也且輪之中有軸所謂軸有三理也輿之下有轆所謂加軫與轆是也軾之前有衡所謂衡任是也軸末則有轆助輻則曰輔輿間橫木則曰軫繫木橫輿則曰輹大車舟端則曰輹小車軾端則曰軾其制雖考工記無所見要其材皆相資以致用缺一不可故軾可以名輿可以名車達常可以名部軾前橫木可以名輹此又因一材而通名之也其為車也有長輹者有短輹者有杼輪者有倅輪者有反掾者有仄掾

者有兩輪者有四輪者有輻者有無輻者有曲轆者  
有直轆者有一轆者有兩轆者有直輿者有曲輿者  
鈎輿有廣箱者有方箱者有重較者有單較者或駕  
曲輿於馬或駕於牛或挽以人或飾以物或飾以漆或樸  
以素皆因宜以為制稱事以為之文也



圖書編卷一百二十五